

新昌縣志卷十一

人物

五代 吳越

石渝仕吳越國為吏部尚書父昉贈太保左右錢氏內獎王室忠懿未及獻籍卒獨子延翰恥之不仕隱居沃洲結廬於白雲谷以書史自娛號雲和子人稱羽林先生後贈白雲先生原隱逸志本九國志

十國春秋 遂家焉增 并詳 大事記

胡景一作環胡氏譜為進思子甯海志同字汝明為吳越錢武肅王偏將

與統軍使張筠趙承泰同取福州陞行軍司馬兼尚書退居新昌之湖卜種十里梅花自號梅溪即忠簡公銓之始祖也葬邑

新昌縣志卷十一

人物 五代 宋

東三十里七星峰下厥後銓孫棟來新昌拜始祖墓因家焉朱文公與石子重還往偶宿梅溪見忠簡遺像因留題裔孫曰擇

善曰祺洪武天順間俱以人才任縣丞原武功傳附所題一詩為省府志所無并未見朱子全集

僅在小說中如碧雲殿一流 後有剛成化志字性輔洪武初其父謫役

泗上以逃亡當死勅駙馬都尉梅殷監刑剛方走省立河上俟渡聞之即解衣泅水而往哀號請代殷憫之奏聞詔宥其父並宥同罪者八十二人明史本傳 淮人至今德之府志原 子延俸封司

空

宋

石待旦字季平其先京兆人大父元遂檢校太保自會稽徙居新

昌待旦登進士志氣異常人勇於爲義隱居石溪山水之間首創義塾三區以上中下爲別身自督教衣廩之四方來學者甚衆類皆當世名士登顯宦者接武宰臣以其文行聞於朝大加褒異賜待之景公問宗孝正奕祖十字爲其子孫名范文正公守會稽極尊禮之稱石城先生而不名聘爲稽山書院長四方受其業者不可記時傳文呂杜韓四公皆出其門後以子貴贈開府儀同三司刑部尙書卒祀於學宮子五允之溫之秀之皆仕修之不仕省志儒林傳次子亞之景祐元年進士唱第時年十七丰神秀俊天子奇之將以尙主使卜其意辭曰親老願歸養且義姻久矣王姬非敢偶也遂不强仕至太常博士以惠愛配享

新昌縣志卷十一

人物 宋

二

吳山廟

均原義  
行志

曾孫公孺字長孺習經術高尙不求聞達丞相

謝克家以國士視之高宗詔求遺逸使者朱異薦其長於三傳召對稱旨命之官固辭高宗曰卿當爲朕勉受一官乃授廸功郎進其所作春秋類例命藏館閣再授監南岳不就還山原隱逸志

石待用字用之任大理評事遷衛尉丞累贈工部尙書金紫光祿

大夫爲人剛毅沉厚幼鞠於諸父以孝謹稱長而才敏治家饒裕築館聚書延師以訓子弟二十年間登第者幾二百人又躬自儉約仁於施與姻族孤貧悉爲婚娶長子牧之字聖咨孝友有聲第進士試校書郎移天台令天台志皇祐三年任有能名時王荊公知鄞縣陳古靈知仙居號江東三賢宰九遷至朝議大夫最後知

溫州有母訟子逆者牧之爲勸諭卒成孝子鹽城海寇鳴張募壯士教以兵杖寇聞竄去永嘉病火民利歟牧之嚴爲約束弊遂革郡有通衢久塞俗傳闢之不利立命撤屋開路所著有往生錄易論解雜文歌咏共七卷門人葉經序其始末尤詳云

原義行并政績志

石景術字順思登元豐五年進士入試時有五考官同夢之異呂吉甫以女妻之授天台尉歲歉卽賑飢民民有贖酒不與奪而往酒家擊之斃令欲論死術曰奪酒盜也安有擊盜而死罪者乎初令以其少易之至是屈服移仙居令有神祠在廨舍景術命撤其像居之自如官至朝奉大夫又善事其母外家艱匱爲

新昌縣志卷十一

人物 宋

三

買宅分俸贍之

原政績志

時又有景略者字仲謨亦其昆弟行治平

四年登進士第授杭州司戶歷官奉議郎贈特進後景畧與景

峻退居洪亭賦詩爲樂

原選舉志注

石公弼字國佐初名公輔徽宗以與楊公輔同名勅改

宋史本傳

喜論

前世事畧弱冠舉進士宿儒就質疑公弼應之如響調衛州司

法參軍

宋史本傳

再調淮水丞後歷宗正寺主簿入見言朝廷比日

直詞罕聞頌聲交作願崇正道遏諛佞通諫諍除壅蔽徽宗嘉納焉擢監察御史進殿中侍御史時三舍法行士子計等第頗事告訐公弼言學校者將以仁義漸摩欲人有士君子之行願使之相告訐非建學本意由右正言改左司諫言東南軍政之

敞以有兵之籍爲無兵之役以太平之賦爲今兵之用異日懼有未然之患其後睦盜起如其言原傳太史保章正朱汝楫冒俸得罪內侍失察宋史公弼奏之矯稱詔旨宜並論如法遷侍御史言蘇杭造作局擾民之害請稍罷進奉從之蔡京嘗薦公弼公弼直諒不阿京忌焉徙大常少卿遷起居郎兼定王嘉王記室故事初至宮賜金緡二百萬公弼卻不受水官趙憲議開直河已而河決鉅鹿法當斬憲止削一官公弼議爲失刑乃出憲京西轉運使蔡京當國奸回專恣臺諫皆其門諸封事必先稟白然後奏御公弼劾京罪惡章數十上京罷相又言吏員猥冗非舊制於是堂選歸吏部者數千員縣非大郡悉省丞在京茶政

歸戶部諸道市泊歸轉運司仕途爲清蔡京雖上相印猶提舉實錄公弼因星變言之竟出京杭州進公弼兵部尙書兼侍讀張商英欲引爲執政不果以樞密院直學士知揚州破散亡命杜除江賊宋史本傳改述古殿直學士知襄州京再相謫公弼秀州團練副使台州安置赦歸召爲右丞封開國侯食邑一千戶贈金紫光祿大夫郡志然其始以丞尉司法時淇水監牧馬逸食人稻爲所傷郡守欲坐以重辟公弼議以禽獸食人食安待不禦禦之豈能無傷使上林虎豹食人可無殺乎郡守委以屬吏使者慮之果如其詳一甲與乙鬪已傷指復與丙鬪病指流血死兩人已以他物傷人論抵公弼疑而鞠之甲實以指血中風死

皆得免供奉高公備綱舟行淮以溺告公弼曰數日無風安有是核其所失錢且百萬呼舟人物色之乃高與寓客妻通殺其夫畏事覺所至竊官錢賂其下故詭爲此說窮治皆伏辜其警敏爲尤不可及

原德業傳由宋史郡志增節

石公揆字道佐幼有至性親歿廬墓三年含哀茹淡三年如一日舉進士授華亭丞進太常博士拜侍御史直龍圖閣初徽宗問宰臣曰公弼公揆何親趙鼎曰從兄上曰公揆大有公弼風歷殿中侍御史高宗朝疏樞密秦檜狠愎剛傲愚闇執癖罔恤人言恐柄潛移陛下之勢孤矣章凡十上上諭曰別未有人姑少待以直龍圖閣知撫州檜旣相因前憾下公揆於建昌獄久不

得罪廢錮而歿事載明一統志

府志

爲御史時嘗同中丞周秘陳

公輔論胡安國春秋傳學術頗僻

宋史胡安國傳原德業志

今祀鄉賢子晝問

字叔訪以父爲秦檜所陷年十四奉其母李屏居苦學不敢應舉及檜死乃抱諫草扣闕訟父冤詔復職恩補將仕郎銓試第

一轉修職郎監造船塲充湖廣江西京西總領幹辦大軍庫秩滿改知鄞縣首白郡請寬賦歛退與民爲期會每患州治稅簿不以時至否則拱手信吏私利重疊乃卽縣廳創列簿鈔至昕夕躬爲銷注寬而信簡而明大比取士環貢院爲廬舍以待赴試之士用一徵十不勝其擾書問亦以間架任民自爲事已聽撤去吏第行文書不得援手又開東錢湖付之食利戶郡庠講

堂壞分勸子弟在學之家誠意既孚爭助成治爲浙東諸邑最  
守臣岳甫以聞平園續藁遷軍器監丞輪對稱旨特命增秩召爲司  
封郎官懇辭主管武彞冲佑觀書問生平居官不苟善會計盡  
心職業錢米出納不爽毫釐鈎校參驗具得其實及論兩淮權  
塲互市營田官莊之弊擇人久任搜訪不求聞達之人皆切於  
時務其爲慮深遠類如此居家歲以三百斛給宗族之貧者疾  
革對其子宗昭申言之官至朝請大夫宗昭別入理學傳原政續志  
石公轍字道叟爲人重交敦義初入太學有同舍生朱彝行寢疾  
無親黨公轍爲謁醫治療既不起其弟昌言聞兄病奔至時棺  
未辦方憂不知所爲而公轍已送柩在門矣且買舟助之歸初

新昌縣志卷十一

人物 宋

六

公轍有目疾在舟遇暑轉劇幾喪明忽夢彝行如平生日目疾  
奈何有爾朱先生藥如神覺而異之至京口岸濱有言爾朱先  
生者公轍因與叩訪不百步已至其處歛門求藥出百餘貼皆  
細如芥子公轍盡買服之瞳神洒洒如注水未幾而瞻視已復  
初矣登紹興二年特奏狀元知江州改建廟學置田養士官終  
朝奉大夫大宗正主管宗室財用後年八十手自校書燈下作  
牛毛小楷如年少者人謂冥報云原義行志郡志由叢語增

石悅可幼穎悟以英傑自許嘗論人物獨推諸葛孔明宣和辛丑  
方臘寇縣悅可率鄉兵平賊以功授修武郎卽讓其兄久可晦  
庵先生爲作墓銘原義行志子斗文以諫諍名斗文字天民爲塾從

父行登隆興元年進士任天台尉遷臨安府教授與朱文公爲友書問往來丞相史浩薦其學問知方行已有恥不爲詭激以事虛名改樞密院編修上書論朝政言甚剴切其曰朝廷譬如萬金之家必嚴大門以司出入一旦疑守者而剽開便門不知便門之私乃復滋甚一時以爲名言因名之曰石大門除揚州通判改知武康軍晚號緝齋潛心學問沒齒不渝卒祀鄉賢

原德

業志按萬歷志於拾遺下有石邦哲名志稿因之列入仕籍稱中興小錄邦哲於紹興間頗以直諫聞亦未詳其官評本於文獻通考百六十七卷引其一事曰紹興十八年撫州泉州誤

決重囚官吏各置重憲邦哲以大理寺丞上疏曰伏觀紹興令決大辟皆於市先給酒食聽親戚辭決示以犯狀不得窒塞耳目及喧呼奪逼有司不以舉行視爲具文使無辜之民強置於法如近年撫州獄陳四閑合斷放陳四合依軍法又如泉州獄陳翁進合決配陳進哥合重杖姓名畧同而罪犯迴別乃誤後而事方發倘使舉行給酒辭決之舊令是二人必呼冤以警官吏之失望申嚴法禁否則以違制論從之原志不錄究未知爲新產否附識於此

王夢龍字慶翔慶元三年進士授天台尉教授隨州辟爲京西檢法官抵襄陽金兵入宣撫項安世得公甚喜咨以征謀一時書

檄咸出其手士皆感動改尙書左銓知龍游金華二縣救災卹患惠於民甚厚幹辦行在諸軍審計司當對奏論今氣節不振大道日靡正論日鬱次論中原俶擾惟當盡吾所以自強之實使動靜屈伸罔不在我除大理寺丞極言今日議論不明體統不一邊備所當嚴歲幣所當絕和好不可恃攻守所當嚴言甚懇切上嘉納之擢監察御史首論媵阿苟容氣節不立士風大壞宜申貪墨之禁陳事務之宜條上備邊四事曰扼衝要嚴策應練舟師覈勝負又條備邊四事曰足兵額置帥二備城池嚴關隘皆一時急務遷宗正卿以歸養辭除直秘閣知溫州以崇學校表先儒明教化移風俗爲務無何以母疾祈間知溫州時

海盜集亡命殺人於貨乃諭海島諸豪俾伺其出沒掩捕而磔諸市境中肅然主管建康府崇禧觀知婺州撥官田一千七百畝爲助役倡民翕然各以田助得田六萬九千畝有奇以備當役者用以議社倉規約大要祖朱子成法又以積雨奏蠲二稅十萬四千餘緡以旱魃奏蠲二稅二十萬一千緡詔赴行在論中庸致中和如九官並命四罪咸服刑賞之中和也好賢如緇衣惡惡如巷伯好惡之中和也又取慶歷名臣余靖富弼論盜賊之說爲上陳之除司農卿權戶部侍郎以疾乞歸卻掃觀書日與幽人雅士賡咏自樂八年如一日年八十三疾且革口占遺表自書其名釋然而逝表聞特贈正奉大夫會稽縣開國伯



食邑七百戶事母孝以答春名堂寧宗受禪推恩臣下不以官其子而以官其弟夢錫曰吾母所鍾愛也其孝友如此晚憩龜潭人稱龜潭先生所著有西銘解諸書原德業志

王爚字仲潛一字伯晦父夢得夢子游入室而生爚秀偉異常父

語之夢卽以聖門之學自勵登嘉定十三年進士知常熟縣敏

達有循政通判泰州知滁州改知瑞州原志嘉熙二年遷籍田令

兼督視幹辦公事淳祐二年監三省樞密院門五年遷大府寺

丞宋史本傳尚書左司員外郎秘書少監原志以人言出爲福建提點

刑獄差知溫州十年差知甯國府遷大府丞國史編修實錄檢

討等職寶祐元年兼權兵部侍郎試中書門下省檢正諸房公

新昌縣志卷十一

人物 宋

九

事本傳疏請大臣相與憂亂而思治懼危而圖安俾內治明如日

月外治勁如風霆則世道昌物情洽上以迓天命下以固人心

致治保邦孰能禦之以右文殿修撰提舉太平興國宮五年京

湖宣撫大使趙葵辟爲副官開慶元年召赴行在授集英殿修

撰樞密院都承旨權吏部侍郎景定元年同修國史兼太子左

庶子極言正論太子聽而悅之上聞之甚喜遷禮部尚書權吏

部尚書加龍圖閣學士知平江府淮浙發運使五年召赴行在

進端明殿學士咸淳元年疊進同知樞密院事兼權參知政事

本傳三年屢乞祠祿始以資政殿學士知慶元府兼沿海制置使

四辭不允七年台州言乞差爚充上蔡書院山主十年十一月

以爲左丞相宋史尋授特進加食邑德祐元年又再乞以舊職奉  
祠右丞相章鑑參知政事陳宜中奏留燾以鎮人心以康世道  
從之燾奏臣本志誓死報國願假臣宣撫招討等職臣當招募  
忠義兵圖興復鑑宜中又奏乞遣中使趣還治事乃授觀文殿  
大學士浙西江東路宣撫招討大使置司在京以備咨訪進少  
保左丞相兼樞密使尋加都督諸路軍馬累辭不許奏今天下  
所以大壞至此者正以一私蟠塞賞罰無章故也宜大明賞罰  
動合乎天庶幾人心興起天下事尙可爲也極言賈似道誤國  
喪師之罪於是降詔切責似道以不忠不孝斥之國是始明六  
月庚子朔日食燾奏陰盛陽微災異莫大於是臣待罪首相咎

實在臣乞罷出以答天譴不許尋進平章軍國重事時命張世  
傑等四道進師陳宜中留夢炎二相都督軍馬燾請一相建闔  
吳門以護諸將不然臣請效死封疆不敢辭宜中夢炎乃上疏  
乞行事下公卿議竟不決七月世傑等兵果敗燾奏比者六月  
出師諸將無統大敵在境臣請陛下自將大臣開督今世傑果  
以諸將心力不一而敗臣旣不得其職又不得其言乞罷免乃  
罷燾平章依前少保特授觀文殿大學士充醴泉觀使燾清修  
剛勁不阿權倖以元老入相值國勢艱危天下屬望乃與宜中  
不協而去續宋鑑不逾年而卒宋亦隨亡矣天下莫不惋歎少  
語同傅葉夢鼎誄之曰公之經術中庸大學公之典型乾道淳熙公

之踐履言行相顧公之出處久速皆宜有真實而無飾偽有正大而無詭隨行乎蠻貊而皆可質諸鬼神而無疑身雖考終於牖下心實未死於泉扉原德業志由宋史增節並詳大事記時有趙炎者咸淳元年仕刑部員外與左丞相王爚善責其附賈似道爚乃極言似道之罪原選舉志弟華甫字君實性嚴勵登進士初宰黃巖有宗戚號難治甫到任見峨冠數十輩聚廡下詰之曰觀政甫曰縣政繁劇卒難觀命籍其名約兩月觀之皆媿服知台州評本引赤城新志言景定元年守台擊強扶弱正疆界均賦稅民爲之歌曰若無王知州爭得飽飯饅鼻頭當時守令爲稱首治豪貴呂省蒼籍其家聲稱籍甚除浙西提刑奏劾郡守朱斗山等皆戚里內降欲回護之終不奉命寢疾俟得旨乃已見郡志原政績志從兄祖洽嘉定十三年

新昌縣志卷十一

人物 宋

十一

仕端明殿學士兼樞密院戶部尙書賜祭葬有御詩原選舉志注

黃兌字和之登進士授汾州靈石縣簿邑居巖間艱於稼穡教以

樹藝民賴以養爲立生祠課最改撫州團練推官知德州平原

縣古田縣所在有聲熙寧中管勾荆湖營田水利檢覈侵漁疏

理淤塞盡心民務紹興二十五年任浙東提舉原政績志

黃惠之字子思

原稱度長孫與下奇孫傳爲曾孫同評本言宣獻於孝宗元年登第後五十一年卒其孫不應在徽宗時必誤遵即刪此句又

傳云師事俞浙則評本言葉適水心集朝奉大夫致仕黃公墓誌銘越新昌黃公仁靜字仲山曾祖朴祖巽父惠之又禮部尙書龍圖閣學士黃公墓誌銘公諱度曾祖諱巽祖諱惠之考諱仁靜袁燾繫齋集同則度爲惠之孫且傳中方臘事明在徽宗宣和康熙志與萬歷志並誤當由前明板燬重刻之故立傳體例只有於名下叙述祖父茲即先及子孫並沿其誤誰秉志軸殊爲可笑等語重厚尙氣節嘗言曰鬼不諂佛不佞

心如秤宣和辛丑方臘盜起焚劫新嵎惠之與弟閒行陷賊中

能以方畧誘之潰敗其衆朝廷遣郭統制收復論功行賞惠之

辭曰破賊藉國威非某力也遂隱不出原隱又其家有奇孫者

字行素敦行誼有古風師事俞浙石九成會稽韓明善該博經

史聲重一時隱居不仕或勸之應試曰衞玉非吾志也所著有

南明志蚓鳴集及輯祖三朝言行錄藏於家一日倚門歌曰夜

夢逢初度悲歡見我翁吾其逝矣遂卒均原隱

呂大亨字聲之宋宰相正惠公八世孫也以字行與從弟冲之同

師止齋陳傳良友蔡行之太學壁記名在陳下蔡上陳蔡既貴

大亨猶未釋褐或戲之曰此謂厄於陳蔡之間也久之授宿松

尉平盜有聲轉平陽丞時嚴秤提之令大亨上不廢法民尤便

新昌縣志卷十一

人物 宋

十二

之終昭信軍節度推官所著有沃洲雜咏葉水心稱其言近指

遠作呂丞行贈之冲之評本字大老英敏夙成博學精思研究典

謨風雅尤工詩文傳良深器之舉進士授靖海主簿有政聲擢

南康軍僉判集諸生於白鹿書院講明理學諸文學立碑頌其

德未幾以疾引退表正鄉閭家無餘貲所著壁經宗旨及詩文

墨妙世傳之均原文冲之孫秉南字景陽幼孤受經於其祖冲

之冲之受經於止齋陳傳良學有淵源秉南穎敏夙成神姿秀

雅舉進士按選舉志是年爲理宗紹定五年距其祖登授福建崇安縣尉

漕司遴委福州校文品題精當人人歎服調寧國法曹獄無停

囚校勘涇縣版籍別疆里清賦稅法行而公私便之未幾丁母

憂起復除吉州吉有劇盜莫能禦秉南集丁莊授方畧數月掩捕殆盡部使葉夢鼎賢而薦之除淮南東路檢法官夢鼎猶以爲未酬其功也尋改昌都令盜攻陷州縣秉南據湖死守出奇銳擊走之民賴以安授尙書省茶鹽檢閱課最遷進奏院檢校南宮試榜一時尤稱得人入預輪對以正君心明道術爲急務語極剴切遷大理寺丞尋遷司農卿固辭不拜卽日渡江歸明年主署仙都觀朝散大夫賜緋銀魚袋居家孝友善教子弟升庠序取科甲者二十餘人秉南資兼文武學有師承歷任艱難咸底成績乃以直道齟齬未究厥施惜哉所著南明稿十二卷

載兩浙通志

原政績志

呂九成字宗學與兄不用九思並稱三彥自以宋室世臣不願出仕兩兄倜儻有才名而九成澹泊雅飭時時誦說溫公晦庵之書言動有禮不與時移易其後兩兄以徵辟仕九成猶自隱約不就推舉終身茹淡被疏絃歌自適同宗子弟數百千人咸敬事九成稍未循禮卽命至堂下戒責皆悚仄謝奉教惟謹莫敢諄謾者嘗道拾鏹數千貫立俟其人還之一少年被酒侵九成從者欲毆之九成曰勿校狂兒死無日也已果爲盜所殺嘗戒其子孫勿游市井曰此壞人心術語載舊志後百餘年浙江參政胡纘宗行部至新昌問邑之文獻乃爲九成立逸民碑推祀

鄉賢

原隱逸志誤係在明後此明爲宋逸民謹依其志改系之

呂徽之隱居台州芳山一日携楮幣詣富家易穀值大雪諸貴游分韻作雪詩得藤字苦吟弗就徽之不覺失笑衆訝延入座援筆立就曰天上九龍施法水人間二鼠嚼枯藤鴛鵝聲亂功收蔡蛺蝶飛來妙過滕投筆竟去問其姓不答令人尾其後訪之則移家去矣原拾遺志由輟耕錄注增節

俞公美名瑞

通志作端

卽浙兄爲人英敏特達學博文古力貧事親奉養送終之事不分責兄弟就試南宮知貢舉真德秀奇其才登端平二年進士授樂清令通判慶元居官精勤明恕不爲勢利屈性不芥蒂於讐怨平生困乏未嘗以貧語人至老益堅忍無戚戚之意間有指捷徑諷者寧不遇不屈所著有剡東錄今佚

新昌縣志卷十一

人物 宋

十四

弟浙稱爲籌山先生

原廉介志評本增節

浙入道學傳

石余亨字成己以文行見稱於時登咸淳進士仕鄞及衢已而棄官歸沃洲自號休休翁避丙子之亂奔走萬山中更號遁翁平生善爲詩文孫璞檢拾遺稿欲鋟梓勿許曰聊以適吾意爾未必名家已而慨然曰吾家更八九世皆不失素業至余身益窮今老矣然不辱於盜賊不死於道路得奉遺體下從先君子於九原亦幸矣因預爲之銘銘曰膠膠乎申申乎將久存以瘁余形乎寧亟歸以全余眞乎悲夫

原隱逸傳評本言原志誤系在黃惠之石公孺前遵卽改正

何正祥鄉舉進士知建平縣主管學校善勸農事

原選舉志注

潘音字聲甫幼聰敏日記千餘言博極羣書爲文能臻奧理生甫

十歲而宋亡見長老談匡山事輒潸然涕下及長讀夷齊傳遂擊節憤嘆日惟杜門讀書談道以聖賢之學自期優游厭飫多所自得其友夏圭孫題其居曰資深堂爲之記後訪弟元甫於義烏會黃晉卿因偕圭孫往從草廬吳澄學澄泰定間以薦召欲行音勸止之不從遂歸築室南洲山中自名其軒曰待清隱居二十餘年謝棄世紛累徵不就日事著述發之歌詠有激昂慷慨之風學者因稱爲待清先生所著有待清軒稿讀書語錄行於世詳見天台戴沈傳原隱逸傳按元詩選小傳誤作天台人

楊轟字子靚又字叔欲先名宜之年十八登嘉泰二年壬戌傳行簡榜進士治禮記有風骨除太平州教授慈溪縣主簿昌國州

判監阜南亭鹽場司令再中大法理評事知金華府通判嚴州大理寺丞是時韓侂胄柄國黨錮禍起朝廷有學行者斥逐殆盡宰執侍從臺諫藩閫皆其門庶公以儒官屈下吏秩滿累遷不越州縣侂胄誅執政史彌遠計樹人藉收衆望丘密林大中樓鑰樓機輩皆起用同時眞德秀爲直學院魏了翁爲起居郎陳昞游九功拔置大僚以吏治用公秩卑不越次亦朝請郎勅監建昌軍仙都觀知興國軍授朝奉大夫尋知廣德軍贈奉直大夫有勳績上聞稍稍內任除刑部郎官秘書太監轉遷大理寺卿立朝風旨多與衆君子合上益重之進禮部侍郎寶慶之間李知孝莫澤輩爲史彌遠鷹犬有言濟王事者悉排斥於是

魏了翁及胡夢星洪咨夔等皆坐貶真德秀亦尋罷公知不可與共立也遂棄官歸

採稿補遺由明于忠肅所作詩序增節

戴質字敏文號崖柏性明敏好讀書師事南明石嗣慶甚器重之妻以女招爲贅壻宋建炎三年進爲秀才紹興五年從岳家軍平楊秦亂授青州團練使封德平將軍乾道間致仕朝廷復旌其門曰文武兼優本籍黃巖南塘貴後卜居於邑之南鄉疊石嶺下因職而名其地曰練使

由採稿補遺

按此一傳何以爲成化萬歷二志所略本志向於私譜已經考定未敢闕入以此文較有證據且值宋末迄元亂又久或因而湮沒亦未可知特破例登之

元

章廷珪字禹臣幼負奇氣與弟廷瑞相師友見元政日衰隱居龜

山抱膝長吟志慕管葛至正十二年方國珍叛據城邑民不聊生珪奮然曰此大丈夫立功秋也遂與從弟廷瑞集義兵設方畧防禦有功俱授萬戶

原武功志

廷瑞

原選舉志作廷端

字信臣自號耕讀散

人舉元至正壬寅鄉科逾年丁外艱是時元運式微絕意仕進洪武初金華宋濂青田劉基交薦之與呂不用同時被徵將大任固辭再三太祖不悅基曰潛修之士懼爲勢分所拘不若因而遂之使之廣教澤於人所益宏矣太祖意解乃與呂不用同放歸田里未幾以本縣教諭任之使呂不用爲訓導輔焉廷瑞曰修己及人吾黨事焉所不可辭已而升福州府學教授卒爲詩文修整嫺雅與呂升呂不用楊溫如諸名賢爲社友所著有



耕讀稿

原教澤志佚一字評本引楊恭惠所作傳增今系以元從其初志也

俞長孺字觀光以字行

陶九成所錄似即此人

為寧國教授寢疾弟子顧德玉

構李人侍湯藥情若父子醫為感動勿受謝後卒殯葬海鹽顧

氏塚心喪三年則長孺教澤可知矣

原拾遺志注由輟耕錄增

呂不用初名必用字則行嘗應元鄉舉有奇名稍長悟曰吾家世宋臣仕非義也遂更名不用字則畊率諸弟躬畊石鼓山下以奉二親繼聞黃先生瑁講學金華裹糧從之自六經諸子傳記騷詩以至醫筮星律兵家奇秘之說皆博涉淳蓄為詩文博辨汪洋出入班馬李杜一時麗靡排習盡洗與其叔呂升天台陳川徐一夔金華宋景濂青田劉基唱酬往來基微時遊放不羈

新昌縣志卷十一

人物 元明

十七

俗呼為劉狂不用與游或嗤之曰此子業萎矣何從劉狂遊耶及基翊輔明興屢欲薦之以聾疾固辭晚年應經明行修辟授本學訓導時亂餘禮經晦蝕率諸生綜釐蒐剔親為疏解且訂集朱子家禮行之一時翕然向化復以聾疾告致仕因自號石鼓山聾後居東岬山又號岬西病牧所著有得月稿牧坡稿力田稿行世載兩浙通志卒祀鄉賢子稷亦以學行著名

原隱逸志誤入明今

遵其志改正

明

梁貞字叔亨舉元鄉試授太平路教授端慤寡言深沉有識明太祖克太平貞知天命有在率諸儒迎拜請斂戢軍士保養生靈

復以三王之得天下者爲言上喜曰老儒先生其言甚是留掌圖書與李善長同侍幃幄密贊謨謀日見親任上欲取金陵謀諸貞貞力贊之命都事江南行省遷湖廣按察司僉事尋陞兩浙都轉鹽運使制勅褒之未幾拜太子賓客日侍太子讀書大本堂多所啓沃戊申以本官兼國子監祭酒設立科條以課士上遣官釋奠及命品官子弟民間俊秀充國子生詔給冬夏衣廩皆貞所倡議也事載南雍志貞嘗輯古詩三百篇進覽上以賓之初筵命丞相直解上喜悅感歎飭勉羣工且命繕寫數十本頒賜大臣俾揭高堂以爲朝夕警省庚戌以老乞歸築墅鰲峰之下日與鄉里宿儒楊溫如呂不用等賡唱不倦以孝弟勵

新昌縣志卷十一

人物明

十八

人可謂進有所爲退有所樂者

原德業傳 志稿由府志增節 府志少二句謂有古大臣風

時有

宗人名沂者永樂二十年舉人授河間府鹽山縣教諭當土木之變保護有功

原選舉 志注

章廷瓊洪武初年舉明經授行人奉勅山東科斷憲臣之不法者繼以內使踵驗時多賄敗而瓊守法獨免特勅旌之時又有其昆季行廷璫者獻詩於金華辟授祥符丞同時里人石如璋以聰明正直任廣信通判令行禁止政治一新府僚均緣事罷而璋獨掌三印吳總以人才辟爲惠安知縣有惠政民爲立祠

均選

舉志 注

蔡思賢洪武五年舉人授本學訓導陞蒼溪縣知縣有惠政

原薦 辟志

注

何友諒洪武初辟任本縣教授博經史避元聘隱居甯海明初就

辟立條約訓生徒

原薦辟志注

呂九思字時學美豐姿多才識初避方國珍亂讀書石鼓山中絕

意用世洪武癸亥以聰明正直徵試稱旨奉命糴粟賑貸歛散

有法公私便之已而勘理江西叛軍計擒惡首而辨釋誣逮者

數百人能聲益著授袁州府經歷尋遷刑部照磨持法明允不

幸註誤而終無諂言聞者壯之

原政績傳由萬歷志增

丁彥信永樂元年仕至武昌府同知為諸生時即敏達異常名其

軒曰淡泊以見志佐郡政事至立辯奸無所容以才調柳州督

新昌縣志卷十一

人物明

十九

建王府咸有成績性剛直不畏強禦以此九載不遷歸老於家

邑事有難處者必迎信諮之悉中機宜

原選舉志注

呂童字邦用治春秋貢授揚州府興化縣知縣自宋范文正公為

令移風易俗至今猶有先賢之遺化童履任旌異節除宿弊百

廢具舉豪吏蘇奎鄧信關節通巨璫視令丞若僚佐童包含歲

餘一旦盡發其奸奏而磔諸市境中肅然日與民墾田闢野治

溝洫修鄉校訓誨其子弟治化孚洽蒞官十三載始終若一日

民愛之如父母童嘗以公事註誤士民赴闕陳懇詔復其官部

餉東南事竣還縣以勞瘁卒吏民哀痛如喪考妣朝夕奠哭者

千數與文正並祀名宦童有識鑒一見高文懿公穀於童穉中

卽以宰輔期之高感激知遇終身執弟子禮爲童撰墓志銘述

其惠政甚悉原政績傳由一統志增節先有中器者明初爲池州檢校諳練有

治才以佐郡守禦華林有功晉江西瑞州知事原選舉志注

章敏字以達幼端慤不喜嬉狎稍長篤學工詩文善事父母孝敬

備至母嘗病癰仰天號泣願以身代侍湯藥衣不解帶母終哀

毀踰禮待昆弟克篤恩義舅氏朱晚頗不振爲築室置田於南

塘以贍之卒爲葬先塋之次永樂癸卯以貢入太學所學益進

宣德辛亥謁選授刑部主事雲南司號爲繁劇敏究心獄事辨

決不留累陞郎中益精斷讞獄囚反司刑者懼累凡在獄率嚴

刑以速其斃敏曰彼雖麗辟國有常典且在獄者卽非反何用

新昌縣志卷十一

人物 明

二十

虐爲囚皆感泣大學士高穀薦擢貴州按察使彝民荒遠難盡

繩以法敏每事必持大體行部布令嚴飭武備崇修學校禮賢

德戢豪強識者謂其寬猛適宜正統乙巳苗賊猖獗攻圍城堡

阻絕道路饋餉莫給設策建議開通川播之路而總督諸官始

獲達境兵食稍足賊鋒屢挫諸城圍頓解軍民賴以全活景泰

壬申引年乞致仕天順甲申進階亞中大夫成化辛卯避疾自知不起召諸孫曰吾爲臣得

致仕爲子得全歸吾何惻焉卒年八十有六歸創花鈿嶺庵捐田置漿以便行人云由原政績

增節志評本

王溥永樂二年仕至建甯府知府平生重義疎財爲政簡靜民便

之又張琦永樂十六年仕同安知縣廉介自持遇事果決以目

疾致政鄉人景重有事每就正焉

均選舉志注

章以善名樞以字行登永樂甲申進士知杞縣府縣困於輸賦吏役因之作奸放富差貧或挪移甲乙或飛洒詭寄於是有力之家終身不調名爲出雇錢而實以飽奸蠹勇力之氓三年兩役名爲任義使而實以供私遣民不堪命司馬光曰差便王安石曰雇便朱子曰義便迄無善策以善第爲三等量貧富約遠近以定役之輕重民皆稱便陞惠州同知杞民遮道攀轅不可留因請於上立主名宦祠朝廷取其法以爲州縣式

原政績志評本由明一統志并

吳偉業所作傳增

甄完字克脩幼穎異家貧力學蕭山魏驥甚器重之比長登進士

新昌縣志卷十一

人物明

二十一

第初拜刑部主事時高庶人叛逮捕株連無辜完爲詳讞全活甚衆轉員外郎出爲廣西參議廣西故百粵五嶺之地彝獠雜處多瘴癘戍兵死者相籍完奏易以土人兵不耗折又建議營田於近地以免轉輸之費從安遠侯柳溥征大藤等峽斬獲甚衆上嘉其功賜以文綺臧獲初廣西民出粟給靖江王府祿主倉詹吏怙勢虐取民罄產不償完爲釐算疏請革之景泰元年轉湖廣左參政時車駕北狩廣東盜起湖南大震完旣督運以給東兵輒以便宜往來視師從克香爐諸寨卒以功拜河南左布政使河南七郡水旱相仍民多流殍完至發倉賑貸奏蠲夏稅其活民以千萬計黃河經汴城堤壞田廬悉淪沒危及城郭

又張秋決浸淫數百里運道不通完佐都憲徐有貞修築日夜不倦堤成而河患息其任方岳前後凡二十年皆有惠政及民時朝廷遣六部按行天下考察獨甄完所治不復命考因使少保于謙諭意其受知眷如此居官清儉夏常服苧葛右方伯馬公因宴會潛令計工製青紗饋之完感其意服之終身居家孝友遇貧乏輒賙之爲諸生時方貧困父嘗受寄鄉人百金父與鄉人俱歿完密召其子還之既貴始終不渝其操時方冀其大用而完屢疏乞骸骨歸卒於家所著有南遊稿歸田錄原政績傳子圭字延器自幼器業不凡立心制行率倣古人隨父宦遊所友皆天下名士屏居東山築精舍終日危坐其中誦讀詩書不事

新昌縣志卷十一

人物明

二十二

進取天順甲申郡邑以經明行修舉抵京聞父疾棄歸父歿居喪不踰禮時射禮久廢邑令芮思請訂行焉居家儉約田穀所入給歲用外一以賙貧尤慎取予苟非分所得輒曰吾爲清白吏子敢自污耶晚年清譽益彰郡伯戴嘗手書賓延之嘆曰先生真可謂聖世逸民矣所著有北遊集東軒稿數十卷其孫昇亦以孝聞於時原隱逸傳

陳孝軻永樂十八年初授錦衣衛經歷以忤指揮門達左遷尤溪令值沙寇鄧茂七亂軻於擾攘傾側中能勞來安集有惠政後以裁抑貴勢受誣至今冤之原選舉志注

楊信民宋侍郎轟八世孫也原志本名誠以字行明史本傳永樂中舉鄉

試宣德間授工科給事中母憂歸營葬土石必躬昇數百步曰  
吾葬吾母而役他人吾不安也服闋改刑科

明史本傳按志稿由江西出任後方改刑科與

史不同鄉里名德他書必不及本籍之詳審若官階升降則當不及官書凡於此等相似者概為疏正

出使江西疏陳五事

多議行正統八年癸亥王文端直薦於朝陞廣東左參議招輯雷化高廉諸州劇盜盡平時按察使郭智所行多不法劾之下獄黃翰代其任益甚又劾之僉事韋廣遂誣訐信民俱逮詔獄法司鞠實翰與廣同坐除名廣之士民赴闕為信民辯白者以千萬計英宗北狩詔以信民守白羊口會廣東賊起信民乃以參議陞為僉都御史巡撫廣東

明鑑係正統十四年九月任景帝本紀都督同知董興討廣東賊以十二月任

紀元編建號東陽

先是蕭養行劫繫都司獄獄禁不嚴破械出嘯聚為亂

守土官不能禦省城洶洶總兵官張安敗死指揮張清被殺而鄉民避亂趨城者又閉門不納盡為賊所殲脅從者益眾攻城益急聲言楊大人家眷勿憂城破當護送還鄉廣人居京者聯名奏乞信民巡撫信民承命疾馳至廣城則被困數月矣信民開誠布公發廩賑貸下令有司多方附循給民木牌縱其出入賊見帶牌者皆不殺曰楊大人所給也歸附者日眾信民素有恩德及民又知賊情委曲乃差能幹官吏各齎榜入蕭養營撫諭蕭養大喜簪花設宴約日投降信民單騎出城數十萬賊見騎出皆倒旗羅拜蕭養泣下跪訴信民安坐諭以禍福即時投降者數十萬人越五日信民單騎復往賊投降者益眾以大魚

獻信民受之不疑未幾董都督興統大軍來賊遂中變景泰元年二月五日有大星殞城外三月乙卯日信民暴卒廣人奔走號哭舉城縞素身陷賊中者亦曰吾輩無生路矣蕭養亦籲哀設祭事聞天子遣官諭賜葬祭錄其子玖爲國子生成化中賜諡曰恭惠其後董都督明鑑興充副總兵於是年始至廣州縱兵奮擊殺死無算蕭養中流矢死函首以獻爲四月事帝本紀列五月乙巳以大兵勦賊所過輒屠之廣民仰天大哭曰使楊大人在慘烈甯至是久之從選人盧從愿奏請立祠奉祀者又數千萬人詔曰可下有司歲以其忌日祭焉立祠後歲有災祥禱之卽應如響民有不平祀而祝焉亦應如響詳邱濬所撰惠濟碑及皇明通紀吾編學浙江按察使周新死無子其妻有節操貧甚信民獨賑給之

新昌縣志卷十一

人物 明

二十四

及卒又會廣東人以營葬明史合傳其風節竟相類

原德業傳今由志稿明史

增節

求琰字尙圭性穎敏好學涉獵經史永樂間以貢授九江府通判蒞政六載一以公廉自持內旨勅造廬山廟出帑金萬餘琰用其半餘悉封還朝廷一日其子由任回行李蕭然惟二竹籠移檄新昌縣儒學開發乃花梨板七十二片題先賢牌位都憲陳智表其賢擢貴州思南府知府節操愈勵以事親不能躬盡孝養匾其所居曰盡思堂常於宅旁植棗一林謂子孫曰吾以木奴千頭貽汝而已他奚望焉入覲卒京師子扶柩歸葬今祀九江府名宦贊其孫也

原廉介傳



呂昌字好隆生而英敏祖九成奇之曰是兒必昌吾門遂名之庭

錄讀書棠川嘗得一古鏡詳金石志

既長慨然有志當世誦恥其君不為堯舜之語

因以恥名齋正統辛酉壬戌聯捷成進士授南京雲南道監察

御史監應天鄉試凜凜有風譽會南都寢殿災英廟震怒詔逮

留守大臣昌抗疏論救極剴切

大略以為天災上天垂戒人君當側身思過不宜濫逮臣下疏入上感悟置守

臣不問

尚書魏驥稱之曰清風直節百僚竦然憚之景泰庚午遷

福建按察司僉事時沙寇鄧茂七嘯聚陷城邑昌上疏乞貸貧

民下捕盜令及盜平詔賜金幣乃問俗明教請修朱蔡諸先賢

祠下有司歲祀之遂為制天順初母憂服闋改遷江西按察司

副使中貴葉鎮守橫甚其奴白日殺人市中昌捕得論死會淮

新昌縣志卷十一

人物明

二十五

邱責民子錢甚急昌視其券久入息多者即焚之葉又謾語激

怒王王乃論昌侵侮宗室事下御史御史素賢昌抗章訟之事

乃白成化丁亥遷陝西按察司使值邊備方亟民困供輸昌累

疏便宜十餘事上悉嘉納陝西漢唐故都其謠俗喜伉壯巨俠

司千戶貲雄一省怙勢殺人昌至言冤者數十百人司乃請昌

同年姚太宰書抵昌昌按其事有驗即上狀逮繫竟斃獄中於

是直聲振中外時又有尹參政王副使方相訐於朝下昌昌直

參政而副使乃姚太宰門生也太宰素知昌直挽昌及其侍郎

書來昌發書大笑曰宰相侍郎乃為屬事耶竟論上如法姚銜

之因之濡徐不徙者數年疾且革乃召其子議議至而昌卒已

數日筐無遺裝巡撫馬文升往哭之檢視僅數金大哭曰世之廉吏有如此者乎僚窠以公錢賻乃夢議而告之曰吾爲吏三十年未嘗私一錢也乃今欲以遺骨爲利耶亟去無出明日議覺而痛泣且卽奉檄行文升親往止之議具說夢嘆曰烈哉先生吾不以小節浼大節又曰廉介似趙清獻慷慨敢言似唐子方蓋確論云正德中推祀鄉賢所著恥齋集與其子諶東臯稿並傳於世

原德業傳評本由尹直墓誌族孫光洵記遺事增節

呂迪一名謹字茂恭痛父爲友死終身哀慕力學能文舉永樂丁酉鄉試授無爲州訓導振明學政士及門者多登第而邢寬大魁天下陞連江教諭鄉達陳密有才德歿無以葬迪捐俸襄事

新昌縣志卷十一

人物 明

二十六

未老乞歸聚子弟教之遠近踵至俞欽侄昌皆門下士歲時奉事甚謹邑人宗之

原選舉志注

呂鳴天順三年仕濟川通判蘇多貴宦稱難治鳴以公廉御之士民帖服崇明濱海潮沙坍漲不常鳴爲疏撥沙地民賴以濟賑荒嘉定積散有方卒於官甚蕭條同寮入哭見四壁蕭然惟三數竹籠圖書而已

原選舉志注

鳴仲兄鳳天順四年進士授工部主

事遷員外郎以介直忤時嘗曰鷓鴣一枝鳳凰千仞引退後顏其居曰松泉清聽自號腐庵老人遁而無悶年八十七

評本由注增

又有名鵬者正統元年仕平江縣尹居官廉謹有爲民惜其去至以配祀王文正公且祠詳岳州府志居家時有族弟以橫逆

構訟公不校尤惠宗族卹患難一以孝思爲則

均原選舉志注作知縣今由呂氏宗

譜增節

丁川字大容成化間以進士授監察御史容頌而暫居臺中有才名奉命巡漕河起利除弊聲稱藉甚疏上政本聖學君心等六事又陳飭時政甦民困等八事上嘉納之總視法司奏牘檢覈各道違錯臺中肅然丁亥留都端門震上疏極言當修德以回天變魏昌侯孫繼宗以外戚視十二團營子瓚掌錦衣衛事橫甚川疏其父子權重宜裁損之又劾尙書馬昂都御史楊璿忘事不法時萬貴妃寵冠後宮干預朝政川上疏論諫罰俸三月成化辛卯太皇太后崩因陵廟事遺旨切責言者川疏曰諸臣

新昌縣志卷十一

人物明

二十七

之請天下公論也聖母之命一時私恩也惟皇上母以私廢公言甚切直事竟寢壬辰擢順天府丞值早蝗疏救荒禦災十五事遷僉都御史巡撫延綏至則上備邊三策開中淮浙積鹽選將帥置弓弩練士卒創屯堡蓋隱然鎖鑰重寄云未幾丁內艱卒於京師卹典有加平生清苦卒之日囊橐蕭然卿士大夫唱賻乃克歸葬

原德業傳

何鑑字世光少岐嶷不羣讀書過目輒成誦登進士知宜興縣廉

公有威革重徵運戶及額外私茶邑人利之擢山西道御史

原志

巡宣府大同劾巡撫鄭甯以下數十人按裨將孟璽等罪

明史本傳

又抗疏論度僧道之非事遂寢

原志

還巡太倉總督太監卒犯法

逮治之爲所構下錦衣獄得釋再按江北鳳陽所在近境法皆死陵軍多依禁虐民鑑請以山麓爲限著爲令志明出知河南府朝廷勅取嵩盧鑛洞慨然曰是貽吾民以無窮之害也執奏止之連歲大稔人相食設法賑濟全活甚衆當道下其荒政於各府以爲式又疏禦災十事上之士民立祠祀焉歷山東參政四川左右布政使宏治六年以右副都御史巡撫南直隸兼理杭嘉湖三府稅釐濬吳淞白茆等港所至事集再撫山東轉刑部左右侍郎原志孝宗覽天下戶籍視國初反減命清查河南湖陝三省流民多方撫綏入編籍者以數十萬計因疏善後十事及軍民利病以聞武宗登極採納之本傳正德二年陞南京兵部尙

書與內侍劉朗魏國公徐甫同管機務朗劉瑾黨也橫甚徐惟唯唯鑑秉法不阿瑾以故啣之原志前撫江南時按千戶張文冕罪文冕亡去構於瑾遂坐以事連罰米貧不能償奏懇獲免六年正月召爲刑部尙書時大盜並起劉寵即六劉宸即七楊虎劉惠齊彥名即明等亂畿輔方四曹甫藍廷瑞鄔本恕等躡四川汪澄二羅光權王洛八等擾江西皆稱王四方告急無虛日兵部尙書王敞不能辦賊武宗旣命洪鐘陳金馬中錫分討其年五月罷敞以鑑代之鑑乃選將練兵錄民間材武士令鄉聚悉樹柵浚溝團結相救河南山西兵守黃河斷大行京操班軍留守所在城邑每漕艘運卒一人屯河濱護運道通行旅文武大吏軼

賊請勅峻責之而褒縣令能擊賊者以中錫玩寇奏遣陸完代還邊將從完討賊賊連爲邊軍所破奔迸四出會中官谷大用伏羌伯毛銳率師駐臨清賊遂謀以十二月朔伺帝省牲南郊乘間犯駕先一日趨霸州鑑立奏聞夜設備厥明帝召問鑑鑑請早出安人心遂成禮而還賊知有備西掠保定諸州縣以去河南巡撫鄧璋請濟師鑑言山東賊不及萬官軍奚啻十倍緣勢要私人營充頭目撓律攘功失將士心請盡遣若屬還都指揮以下失事卽軍前行戮益調邊軍助璋帝悉從之尋以捷書屢聞加鑑太子少保明年正月賊突霸州京師戒嚴鑑令邊兵急邀賊賊遁去賊渠楊虎朱諒死其黨分擾山東河南鑑以山

東賊劉寵劉宸齊彥名等責邊將許泰郤永劉暉李鉉以河南賊劉惠趙鏖邢老虎等責邊將馮貞時源神周金輔未幾毛銳敗績與大用俱召還鑑乃請用彭澤與仇鉞同辦河南賊而以山東賊專委陸完五月河南賊平七月山東餘賊亦平陳金洪鐘亦以次平江西四川諸賊帝喜加鑑太子太保廕子錦衣世百戶鑑乃上言羣盜蕩平民罹兵久乞量免田租多方賑贍黜貪殘長吏停不急工役還民故業貸以牛種復其家三年有訐舊事及怙惡者並置於理帝悉報可先是七月中鑑以羣盜未盡邊將劉暉戍山東時源戍河南郤永戍畿輔李鉉戍淮揚各假總兵之職俟事甯始罷仇鉞請留三之一討賊餘悉遣還廷

議二人議俱是請四將各千人鎮壓他將許泰神周金輔溫恭輩俱統所部還邊鎮帝時好弄兵羣小寵幸者言邊軍慙健過京軍遠甚宜留之京營帝以爲然至十一月三鎮軍畢至遂命留之以京軍往代鑑力陳不可廷臣復極言其害帝竟不從自是邊軍於大內團操號爲外四家軍而江彬進用矣八年宣府送迤北降人脫脫太等至京命充御馬監勇士鑑等上言降人出入禁中假寵踰分且生慢侮萬一北寇聞之潛使黠賊僞降以爲間諜甯不爲將來患帝不聽甯王宸濠謀復護衛鑑力遏之都督白玉以失事罷厚賄豹房諸倖臣求復鑑執不從諸倖臣嗾訶事者發鑑家僮取將校金錢言官遂交章劾鑑致仕去

新昌縣志卷十一

人物 明

三十

越中三不朽傳七年九月加太子太保廕子錦衣世百戶八年十一月致仕

閔九年卒年八十

明史本傳與明鑑通志同後

濠反果如其言卽此役雖祇四年而其蘊結非一日使非公統籌全局則流寇之旣且不俟數傳後加以宸濠一變王文成又何所措手明代本兵特重其權究亦于忠肅與公二人而已公於憂居時雖卽一事一物之微無不與地方有司相勸導其以天下爲己任知必有不僅在此四年中者迄今新民感德建祠歲時祀之

原志如築長隄請度田減軍需革冗員改京運除徭役減圖里請賑濟併倉廩修通衢之類新昌丞必是時奏革又廬文集寄鹽引於

崦亦其一則計有十德惜以煩碎未及贅錄越中三不朽傳陳本惠鄉十德報國十策 百世下猶蒙其利區區桑梓云乎哉卒之日雷雨晦冥朝廷遣臣致祭所著有五山奏疏及

吟藁藏於家

原德業傳

何宇弘治十三年貢至部改襲父鑑蔭初授甯國府通判奏蠲逋糧歷任南京太僕寺丞懇免皮張銀及額外騎操馬匹乞歸終養義瘞饑殍若干人

原選舉志注

又九功字宗元仕嘉善縣訓導陞

江西武甯縣教諭轉泰州學正三仕皆有稱祀武甯名宦

以上二人

均選舉志注

俞鐸正統四年仕至雲南布政初由部郎陞知南昌甯國府有惠政民立碑以誌去思歷官雲南參政陞布政時邊徼多事鐸一鎮以安靜夷民帖然後以次子深貴進階正卿深成化十一年仕至工部侍郎初知休甯有惠政列祀名宦擢御史不避權貴屢遷雲南布政一遵父鐸所行既歸深自養晦不輕謁公門

原選

新昌縣志卷十一

人物明

三十一

舉志注 孫集別有傳

俞振才字仲才弟振英字仲英成化中相繼登進士才初名躋少侍大父用直歲饑才曰何不賑以倉穀大父奇之甲午乙未聯捷成進士授行人孝宗正儲位才領詔川陝親藩厚遺贈才一無所受時建却金亭

巡按御史屠滂詩云千載芳名今始見一朝清節古難尋

命掌襄藩喪禮才

一循舊制不科歛而事以集擢廣西道御史巡視中城一總戎有權倖才以不謹劾之遂爲所銜誣以他事下錦衣獄得白大監汪直用事管家怙權作威才蹤其事執之時縉紳訝甚不顧竟以法遣出按貴州苗寇猖獗馭諸酋以恩義土官有能馴彼俗者輒行嘉獎時皆信服又條陳兵備司久任五事復按四川

宋承奉者

評本名集為蜀藩內瑤以財雄

營壽藏踰制且私剋僧院居守才按法

當毀因以學士宋濂遷葬之

府志洪武時濂謫蜀卒於夔州尚在淺土評本初蜀王會為先朝有輔導功徙葬成都然

亦卑隘弗稱公即借以倡議蜀王從之為千古盛舉

巡歷諸郡黷宮多圯壞令有司修葺因題

請行諸省提學官時加巡視以崇聖道丁未任湖廣按察司副使分巡荆南道兼理十三郡戎政歲大澇民饑多聚為盜才便宜賑之發兵禁勦一方賴以安南渭王長子有罪才議請於朝勘實以聞廢為庶人松滋郡王犯法招撫按三司閱實才以計誘而執之咸服其見武昌知府王達恃權威大肆婪暴郡民苦之監司莫敢發才錄民冤詞百數以聞命下才治之如法臬司有淫祠為官民尊信才命改為攢造按牘所惑遂解進表至滄

新昌縣志卷十一

人物 明

三十一

州卒無以為歛聞者惜之才性孝友侍父母未嘗有惰容敦睦宗黨急人患難歷官二十餘年家務全不經意公退必讀書所著有皇華集內外臺集湖南聯句詩湖湘稿新齊集子朝文朝冕俱歲貢以文學名世

原廉介志

英少聰敏有奇氣好讀書為文始

授安東知縣一日得淮流浮尸衣夾揚州市繪目曰是必有冤遂遣數人分入羣盜中市繪默察其色記相符者貴買之一人得數縑歸與日無二索其舟果得餘縑并所掠少女衣物女言亡官眷屬被害已十口矣獲盜二十餘衆皆伏死人稱神明移官臨淮和易寬平民稱樂業弘治戊申詔修憲皇寶錄博采公議英得以循良附名國史後丁外艱再補豐城邑大旱申理淹



獄露禱不食明日大雨民歌曰兩歲無麥今得雨伯丁內艱補貴溪令平反疑獄不致沉抑擢廣信通判會有國喪中使逞威所至贖貨英挺然面折數其罪狀上下賴之陞陝西兵備僉事以斬彝有功擢尙寶司卿逆瑾擅權文武將相皆出門下英至京或謂曰曾謁劉司禮乎書刺必謙抑英再三詰故乃以已刺示英英不答出曰吾老矣不能借尙方劍尙可俛首奄豎稱小的乎遂棄官歸天下高之家居甘澹薄時人無異議焉原政績傳省府志合

傳茲因之

振達嘉靖二十八年亦仕潮陽縣教諭達質粹學純端軌

原選舉志注

範兩爲教職皆得士心肖像祀之

呂大川字中原別號中孚成化庚子舉人甲辰登進士歷任知廣

新昌縣志卷十一

人物 明

三十三

東惠州府居官五載卒於任嘉靖間追祀名宦祠惠州名宦傳稱公才識精敏決判如流吏不能竄其私至於簿書米鹽皆有條法郡城東北瀕江恒被衝齧公哀土甃石爲巨堤以捍水患某所淫祠鄉人事之命沉於江杖其人而遣之郡學就圯重建尊經閣修饌堂號堂作射圃觀德亭正德丁卯征劇賊張權公隨軍督餉察諸俘之脅從與註誤者釋之所過鄉聚召耆老諭之以禮南海張詡曰呂惠州之政霜雪內有陽春戎馬中行俎豆者也語見明一統志及李氏藏書原政績傳評本增

呂獻字丕文生有異徵大父奇之植槐以識旣長博極羣書張莊簡公稱其文大類杜詩從遊者數百人遂魁鄉薦登進士授刑

科給事中校文南宮得費公宏蔣公冕皆昭代賢相孝皇登極  
擇文學德望可使交趾者命獻及劉戡賜玉一品服以行竣事  
歸贈金悉卻不受廉聲大振太監李廣怙勢受金以富兒爲駙  
馬獻劾罷之又因災異陳八事明史孝宗紀七年二月以風雨拔孝陵  
樹詔羣臣言得失九年夏四月下給事  
中龐泮等四十二人此所云災異未詳本傳岷王奏劾武岡州知州劉遜命逮治  
一事謂錦衣爲天子親軍非不軌及妖言重情不可輕遣遜所坐微王率奏左證  
百人勢難盡逮宜飭撫按官體勘疏入忤旨遂同入詔獄吏部尙書屠浦率九卿  
救之方得釋當卽爲岷王事後又云孝陵災相隔已五年至十四年正月因地震  
陳言又距五年原志此傳恐  
先後倒置姑以存疑仍之如策大臣以答天變抑親貴以昭至公  
尤人所不敢言者及孝陵災抗疏直陳闕失上嘉納之時壽甯  
侯張鶴齡兄弟倚宮掖勢燠炙一時遊宴後庭出入無禁獻反  
覆極論之上怒廷杖三十下錦衣衛獄獻慷慨賦詩旣以其言

直釋之遷禮科給事中光祿卿趙鉉獻同年友夤緣驟陞劾之  
不顧居諫垣章凡數十上皆切中時事正德中擢應天府丞於

先賢傳劉六寇江界凡三  
過南京以獻有備不敢入

時輦下多事獻剴決不留廉得筦庫者盜

銀數千衆驚以爲神性寬仁見民當杖目必左右顧民呼爲父  
正德中改順天府丞武宗耕籍田日獻禮儀嫺習欲以爲尙書  
逆瑾索賄不遂十年不調丁內艱服闋轉府尹陞南京兵部右  
侍郎明年捧表入賀瑾揚言將中獻奇禍知獻者以告且勸解  
官獻曰死生有命君事不可廢也未抵京而瑾譴死矣未幾引  
年乞歸獻居官廉介三十餘年止構一宅區曰遺白堂爲給諫  
時有功及鄉里而不自表暴也日吾以陰德遺子孫耳性至孝

既貴父對客坐獻侍立終日著經史定說使學者得究宗旨又長詩文善草書有甲軒稿使交稿行世卒朝廷遣官諭祭蔭其孫一人嘉靖列祀學宮原德業志由明史龐泮附傳增孫仲景以祖蔭爲眞定府判捕發奸宄范嬰等聲稱赫然肅皇南巡倉卒具供應趙州皇廠火懸金募構不日而成時同官皆科甲仲景以才能獨著署府篆薦陞祈州知州原恩蔭志注曾孫繼儒字明谷生而穎悟性復沉摯淹貫經史爲文直抉理奧聲名重一時萬曆己卯邑令田瑄禮館之俾修新志凡山川人物土田貢賦有脊有倫瞭如指掌又同修郡志焉授吳興博士以振興文教爲任著經說重行誼士之貧者資以膏火所造皆一時名碩吳興郡志亦出繼儒

手世稱良史有詩文集若干卷及莊子刪註學通十纂諸書尤爲世所傳誦原文學傳元孫天祚字大呂湖郡博士繼儒伯子克紹祖父志補弟子員刻勵下帷長吏之庭足跡未嘗至居恒引白鹿洞規及顏氏家訓律躬以課子孫遇黨里災患不啻身受必扶植安全之有疾者典衣佐藥餌全活甚衆有喪不克舉者捐館糈以助焉其母何氏奩田甚豐悉均分庶弟天祚以書生好施晚年寥落清操自守會貸筐甌於鄰啟之中有遺金數十兩亟詣還之彼亦不知所自詰之始知爲家人私藏者其隱德率類此孫六人正笏正音入清別有傳均文學志又有兆虞者字濟衢亦少司馬之後守祖父遺訓篤志嗜古行文必規正大與人和

易鄉黨重其雅量尤力敦孝道步趨必隨供菽水極誠敬子六人俱授一經科第者二以子正音貴贈奉政大夫刑部郎中配丁氏贈太宜人孝上慈下稱內助焉

原教澤傳

潘惟清端謹有識量宣德中上司捕剋寇台有富人以匿寇懼罪

囊百金托爲脫計惟清詣視公牘無其名以金還之又嘗擒寇得贓悉以解官年八十一

原選舉志注

俞邦時字夏卿父振強嘉靖二年初授池州府推官值歲饑賑濟有方江上盜起強以萬全陣法討平上利弊五事詔下行之陞虞衡司主事進爾風圖以寓諷諫奉旨褒嘉進員外郎時武定侯郭勳用事強糾其不法數事爲所中傷降大理寺副督大工

新昌縣志卷十一

人物明

三十六

抗章諫止營繕忤旨遠竄雲南蒙化衛未幾郭敗起知江西上

高縣不赴

原選舉志注稱有傳今未見

邦時行居長少列鬢序究心理學淹貫

博通而於天人之旨律呂之微尤爲精徹隆慶間著書四卷闡晰三才五行陰陽事物大率爲天下千變萬化總會一元書不

滿百篇其理根於大極其義仿乎洪範比皇極經世書尤爲簡

約云

原文學傳

呂世良字中遂父廷圭有隱德慷慨能詩文所著有魯翁稿世良夙承庭訓宿儒章上一見奇之以女字焉既長博覽羣集尤究心周易每讀一卦輒畫壁間終日端坐默玩不不授諸子曰夫子晚而傳易孺子未可與言也乃以書授其子光洵以春秋授

光演光泌以詩授光龍其事親曲致愛敬沒而致思吉凶四禮咸遵晦翁而建家廟創壁室置宗田辯大小宗各以時奉祀兼用丘氏儀節遵時制也歲常大稔府倅發倉賑飢者待哺大闕吏卒盡走府倅亦避匿乃命演書帛揭以諭饑者饑者卽斂而就賑又嘗與衆濟江將濟風霰大作亟令艤舟江渚活者數百人其長厚有陰德多類此後光洵爲御史視京營北兵大入亟遺書戒洵宜致身許國旣而兵退洵得歸省演補庠生泌龍皆太學生乃闢墅芝山之陽日與客徜徉歌咏所著有芝山稿配章氏克閑婦道唐順之爲作傳子光演號蘭洲少爲邑諸生淹雅端凝見知於孔文谷唐荆川薛方山諸公嘉靖朝歲薦入

京率諸生上慶壽表廷試後卽賜冠帶任休寧訓導崇齒德講經學教澤大著生平善繼述於宗祠中題作義藏以安祧主事大父母逮父母存歿葬祭莫不誠恪盡禮撫庶弟孤侄輩爲綜析家產情義允愜推念外家窘替與置營屋祀田伯兄大司馬光洵爲御史代巡蘇松時安姓者被訪齎數千金詣演演嚴却之吳中至今傳呂御史清乃弟亦清云居家善彈琴工詩喜摹右軍書法所著有春秋要旨借月軒集行世光泌以入貲授光祿寺署丞性孝友祖妣張守節泌赴闕奏請旌閭及病率妻潘朝夕供湯藥虔禱城隍捐田享祀爲母置外祖祭田居太學使江南與名公賡和咸嘆服之所著有棠州稿卒僉憲曹天祐過

三山祭其墓詳見大學士呂本所撰誌銘

原例貢志注

光洵別有傳

光升光化亦其羣從行光升號蓮峰與徐文長楊秘圖以詩文相唱和督學孔公游石梁命作詩百韻濡墨立就一座嘆賞詩詞翰墨號稱兩絕貢入京授湖廣長沙府別駕甫八月卽賦歸來後年九十終光化號桂泉爲諸生以淹雅著名與董潯陽范應期同修浙江通志著述多出其手貢授河南輝縣清介有守丁內艱回籍亦不復任年八旬六所著有庭聞錄高年錄藏於家以上均文學傳光迎以增廣生入太學成均推爲領袖申瑤泉時行尤器之出授常州主簿原例貢注

呂世東少時習舉子業以伯仲二兄俱積學善文弗售乃絕意功

新昌縣志卷十一

人物明

三十八

名讀古書工詩文善各體行草年及壯以家務盡屬諸子出遊台溫名山適三吳探三泖虎丘之勝大嘯狂歌而還卽閉戶靜養足跡不履城市郡守邑令多就山房訪之或留飲高談瀕行卽拜辭曰山人不敢入公門報禮云所著有三呂集詳見督學

孔天胤所撰墓志

原遺英志

俞朝妥字寵之號未軒嘉靖癸未進士初任江西吉安推官補任廣信府推官俱以風力著聞秩滿內召除禮科給事中歷工科都與分宜不協遂以養母告歸杜門不出惟讀書小樓積數千卷額曰聚興著惜陰圖說梓訓後人經年部擢京堂堅臥不起先是新邑無城東瀕大溪山流彙漲漂沒廬舍最爲民患公疏

請築堤以捍工費浩繁恐加派反以病民遂懇請動支本縣正供奉俞旨東堤成高丈餘闊三丈民免播越至今永賴焉又建歷世祖墓碑捐田供祀助資拓宗祠其惠鄉閭永孝思如此病革囑其子則存曰吾平生無所歉惟君恩未酬耳取筆題云雲烟過眼竟何有星斗在天終不磨令鐫之庭柱以示子孫後孫節愍克承先志其貽謀遠矣

原德業傳

俞集字汝成

評本別號旗峰父鐸母呂夢緋袍人入室寤而生茲按俞氏宗譜集爲鐸三子浦所出則係孫行評本誤

第進士初

任長州知縣首除稅外羨金千餘鎰誌稱其節愛多惠政丙子丁內艱民泣送接丁外艱服滿補蠡縣車駕南征集迎於定興之北供億如禮用是才名益著召爲河南道御史巡視十庫首

新昌縣志卷十一

人物 明

三十九

疏四事

評本一查額數以防侵尅二重法令以杜攬納三飭門官以革逼取四懲庫役以息誣詐

大要在清國用以甦

民困上嘉納之巡視北城帶管九門以舊時內臣用事專侵門稅疏言點開九門官軍當差科道部屬以杜侵利之權侍文華經筵疏言羣臣講輟當賜坐以諮民瘼庶文學政事兼舉奉勅查大同諸邊錢糧因劾用事太監劉庠蘇縉等效尤罔利邊儲耗竭由是上寘以法又疏江彬諸黨往來邊徼狎侮撫臣請假撫臣便宜行事以重其權并請添分守數事悉從之使還有薦起大學士楊一清者集抗疏一清文章政事雖有可觀先朝蟠結黨與善交近侍幾於四維不張者不宜復相御史何棟朝參失儀外補疏言海內新承休德不宜有疎遠諫臣之名乞召還

疏論太監于經輩乃三張黨與不宜敘用以起後釁地震疏乞  
禁止營作數事皆見採納已而巡按河南公以兩河見經奸逆  
廖鵬之橫征繼被狂賊王堂之流毒重以歲稔因奏蠲稅糧數  
千並太和賊黨劉現丁寶等嘯聚潁鹿間疏乞預處羣盜免毒  
兩省未及報賊入河南集隨軍紀功激勵將士卒討平之上賞  
以金幣又奉勅督河南漕運疏言河南歷年盜賊災傷彫弊已  
甚宜暫停止時點差御史清軍河南因疏曰軍匠盡係賑恤之  
家若清出一軍則必追妻貼解民苦出辦必至逃亡乞將見差  
御史奏繳勅印所帶人吏改撥從之又疏請停刷卷以卹疲民  
乞銀內帑以濟通許請添兵備以守陳州乞新中進士以補州

縣築堤桃村店西王集等處以治河患又以教弛爲慮乃檄七  
郡諸生肄業大梁書院士類感激以詩頌曰柏府春風事竣復  
命又疏抑宗藩及儀賓數人後差巡視南直徽寧池太道病抵  
家卒集爲人天性鯁直胸懷磊落卒之日家無私藏惟奏章盈  
篋而已有司祀於鄉賢中州祀於名宦蠡縣誌亦有傳著有隨  
筆一卷西行贅錄一卷中州奏議巡稿十卷雜稿旗峰文集詩  
集行於世原德業傳  
由評本增子時及嘉靖二十六年授長州縣知縣改徽  
州府教諭陞國子監丞刑部主事左遷壽州同知陞順慶府同  
知未蒞任病抵家卒及狀貌俊偉性沈樸讀書務窮理奧不事  
生產爲官廉介自持以故二十餘年仕途淹滯亦視之宴如也



長州志云渾厚敦靜民方安之忤按使意調去蓋歿後見思之  
定論云著大學古本就正錄宋蔡傳說意新安寓藁蒙泉集時  
歆亦其昆季行父柔爲福州府推官皆以廉介著名嘉靖二十  
三年仕至刑部主事初授政和知縣有惠政祀名宦二人均原  
選舉志注時  
及子斗方號懷泉高祖鐸祖集父時及皆進士以清白世其家  
斗方生而穎慧過人性復豪爽家徒四壁不以介懷登萬曆甲  
午鄉薦就懷慶廣文日與諸生談經講藝盤惟苜蓿怡如也後  
陞彭澤令居官清靜不擾每嘆曰昔陶靖節不爲五斗折腰我  
何爲此僕僕哉遂解綬歸任意游覽足跡旣半天下所至文士  
皆從之遊稱爲懷泉先生原文  
學傳

劉忠器字世用登進士授永安知縣改崇仁擢南直御史奉命巡  
江終太平府守爲人清苦自勵不可干以私舊蕭山令鄒魯性  
貪黠雖爲讐家瞽其目益橫專持守令陰短以行其貪忠器待  
以禮餽贈一無所受屢有干請皆卻之有魚池利甚溥魯乞佃  
忠器卽命魚戶分掌收其利以給學徒魯雖善訐卒無可指摘  
者居鄉出入徒步自登科至貴顯匹馬隻夫不以煩縣或以爲  
舊例當得忠器曰吾無一毫及鄉里敢勞費之哉居常惟以家  
園蔬蕝自給卒於官殯殮外筐廩無餘物子孫貧乏有不能自  
存者鄉人並爲推服至今不忘

原廉  
介志

家婦丁氏孝烈有傳

其家  
祠匾

額曰清天一升始見甚錯愕及悟增生聲始知卽崇仁部民來新親獻者崇邑瘠  
而喜訟向易積壓民自囊米以赴讞或以斗石計公隨到隨訊不勞一日儲故民

云然聲其裔孫有孝行善氣撲人子茂才章於贊襄祠事時申述其祖德尤詳清白家風百年未艾故備述之以誌景仰

劉芳弘治十一年仕兩淮運判居官清介致仕養親隱駱駝山麓

非公事不至縣庭以故邑令每推重焉

原選舉  
注志

潘律曾祖原達元季率義勇保障鄉閭父成章好學修行不求仕

進工於詩文有錢塘懷古一律入明詩選粹為時所傳誦

原遺  
英志

注律字孔聲號東溪子師事胡復齋張汝威習理學日記數千言羣經百氏靡不窮貫為文章豐贍新麗不類山林所作養親必躬進甘旨母喪凡三閱寒暑不御酒肉遇諸弟友愛不事生產以清約自持教授鄉里學徒林立嘗作豪歌以自況所著有

東溪集

原隱  
逸傳

潘溥弘治二年三仕學職皆有教澤及人終國子助教素介潔歸

之日行橐蕭然又有沃者

選舉志同封蔭志  
作沐未知孰是

弘治十四年仕雲南

按察司僉事居南臺陳時政八事劾貴戚張某不法尋轉雲南

道出討十八寨平之所著有容庵集藏於家

以上二人均  
選舉志注

潘晟字思明號水濂丰儀玉立穎異絕人弱冠聯雋南宮第七人

廷試第二由翰林掌成均兩知貢舉官至南都冢宰晉光祿大

夫太子太保禮部尙書武英殿大學士方世宗晚年專事靜攝

往往醮祀宮中詞臣多以撰青辭獲進晟堅執不為遂致仕神

宗在東宮翼輔多功江陵當國相與左右時宗祿不貲司農告

匱上宗藩事例以均贍之歷仕五十餘年難進易退休休有容

對隸人未嘗有厲色遇童穉言必稱名其貴而不驕如此性好施歲大稔作粥以食饑者全活甚衆捐贍學田百畝以爲諸生堂饌出貢之資至今德之善書法山陰徐渭推爲獨步原德業志并詳大事記兄最少向學以晟貴在家敦孝友捐田供祭出粟賑饑以吟咏自適訓七子皆業儒原選舉志注子復泰孫志省字以魯號公理弱冠以祖蔭入都出遊遼左諳邊事精天文長古文詞喜畫梅竹善書法傲南宮而不囿其跡焉初任興化府別駕郤里書例金千計捐貲重修學宮調山西潞安別駕郤機人例數百縑清操益勵解任歸日事遠遊南入閩粵西歷川隴北涉幽薊東經齊魯所至名山勝境題咏殆徧生平性高行潔超然名利之外

新昌縣志卷十一

人物明

四十三

多所傳著有邊詞宮詞及梅花咏各百篇識字記百卷其書跡

墨竹人多珍之

原文學傳

呂曾見字少真號眉陽博極羣書洞明理學宗旨爲剡邑俞敬則壻俞度其嗣不克家欲推產付之力辭不受兄弟早世撫育兩姪如己子產取其确者貢授開化縣訓導後陞衢州府教授皆以朱紫陽陳止齋之學立條教所造如徐日久方應祥輩皆魏科名碩所著有士人關鑰吾與編筆奕諸書行世以子新周貴贈奉政大夫滁州知州

原教澤傳

呂興道號藏虛始祖評事億季子紹彭自新徙山陰陡暨興道生而英敏讀書日數行下鄉黨異之無何以父德瑞病痿不敢頃

刻離遂謝舉子業朝夕拮据養親必致甘旨以悅其志數十年無倦容及親歿哀毀骨立一時難之居鄉以公平率物鄰里遠近咸取正焉造石梁於橫山荷湖以度涉率長子廷昇市麻苕溪舟人匿貨將鬻子媳以償令貸而勿校臨終對其子云予先時曾爲族弟某代書借券以解其紛今將予橐中金償之以完吾志諸如此類仲子廷雲以己酉魁於鄉孫枝繁盛廬陵劉作樑爲之著行狀三韓陳大典爲之贊有云弗榮進取孝養厥親終親之世孺慕彌真好施賑急冠冕日新原孝友志

董茂醇嘉靖十八年仕泰和縣訓導幼隨父廩仕興化讀易通太極圖諸書卽了大義曰是書本自昭晰晦翁所註另作一編可

新昌縣志卷十一

人物明

四十四

也志行純篤取予不苟嘗讀書旅邸有美婦三挑之不動所著

存心圖說思朱錄與董伯文稿並傳於時原歲貢志注

胡禎字用良甘貧力學尙志慕古鄉黨間聲稱籍籍足未嘗入城市士大夫聞其名弗克見結草亭於宅外聚古今圖籍終日吟誦其中不慕仕進所著有草亭愚辨等書古淡平實有關世教與江浦莊景嘉禾呂原詩文往來監司王華禮幣獎重府推周進隆知縣唐夔皆欵門見焉莊景寄詩曰聖主狂奴自古容溪山此意便無窮誰知宇宙千年病我與先生一樣風越水以東惟剡曲子陵以下幾漁翁閒忙莫問今誰是時止時行道只同原隱逸志

俞則全振英孫嘉靖十四年授安福令歷廣東道監察御史應詔陳黜巨奸宥狂直闢異端恤民隱四事又論權貴郭勳六罪出

爲廣西僉事以計平猺獞尋遷參議歸所著有翠微集

原選舉志注

何廷諫邑庠生生而穎異博聞強識多所畏服居家庭之際孝友兼盡仁義均施持身以端嚴謙讓爲先動靜語默不離乎敬有先輩儒者風處鄉閭中凡有求貸隨分必應絕無德色至於訓誡子弟惟以敦倫守正爲家法誠爲士林中之表式也子相繼登賢書又有何繼以入資爲太學生仕鎮平知縣有惠政民建祠祀之家居深自晦匿與物無競何緒號遲庵由廩生入太學初仕古思知縣改大埔縣條陳水利均徭十事皆在施行民甚德之陞兩淮運判

以上均選舉志注

陳獻成化十六年仕江西寧都縣知縣訪民利弊以身先之藩司

新昌縣志卷十一

人物明

四十五

方某至其邑曰清勤之政當道皆知之更當加勉是夕命一皂索酒獻如命奉之開飲曰欠美復索之獻佯爲不解意更進酒方不悅摘其事罪之獻受誣歸又有徵字履廷幼孤事母至孝吉凶大事悉遵朱子家禮置讀書田以貽子孫生平言動不苟善書法工詩所著有半閒集十二卷行世正德間邑令薛文易毛震爲之序

以上二人均選舉志注

呂永國字有道號蓮若姿性英敏淹通經史剖晰理學持身端莊謙厚爲鄉閭推重暮年不慕圭組惟課子作心昕夕討論賡詠有墨莊漫錄太平雅韻芸窗隨筆縣圃積玉採芝唵諸集人以紹文獻之傳稱爲博雅君子

原隱逸傳案今所見墨莊漫錄爲高郵張氏邦基所著與此異

又有鼎

者成化二十二年仕廣信府通判性慈祥寬厚爲政一以濟物爲主聽訟惟爲之解釋居鄉恂恂有文譽所著有梅軒集

原選舉志注

呂若愚號望松爲人方介不妄言笑非禮勿蹈入太學嘉靖四十年舉於順天次年登進士例以行人當得京職以同選人忤吏部要人意始授長州縣雖勢要不少屈首除火葬禁繼授江西瑞金令下車益礪操守不假人顏色興利除害民愛如父母敬若神明縣有妖術惑衆能驅雷電聚徒千人若愚廉得呼之來抗不服杖之忽霹靂震公案不爲動立柱斃之邑人懾服襄校秋闈得安福劉公臺等爲名臣又按甯都亦以善政稱三年考滿陞南京行人司左司副

原志作轉刑曹誤

便道歸省首勸族祖光洵出

新昌縣志卷十一

人物 明

四十六

建宗祠費司故閒曹有冷官吟藏於家二年陞刑部員外郎出江甯縣鉤失庫銀衆窮治庫吏賄新任狀部長趙錦始未信繼且嘆服旋轉兵曹首張牌於署前凡侵牟等弊准挾牌赴告上下肅然尤力除害馬諸陋規是時江陵專政漸操切公門下士劉臺將糾之自遼東巡按貽書謂不敢緘默以貽門牆羞忌者遂以是媒孽於江陵適同鄉潘公晟奉命至吏部考事語人以劉爲公門生公卽自知不免遂致老

原志以兵曹事爲同僚所忌悞

家居淡薄跡

不履公庭縣令請教無一言及私事新邑舊解南糧何司馬鑑

奏免後鄰邑攀新同解若愚力言於撫軍遂得免解如舊里遞

德之釀金三百致謝卻不受因建祠西郊歲時祀焉

原政績傳今由呂氏譜改

正本例於私牒向不輕信惟此較實且原傳語太芻蕘故特補之

呂繼棟字思楸號珍吾三歲失怙知悲泣十二能文同族司馬光洵一見稱異事二母至老尤以顯揚為盡子職篤志力學乙酉舉於鄉試南宮隸乙榜以母老未沾祿養就泗州授講道興行人士翕然謂湖學復興列志名宦陞蜀慶符令慶適大校設法賑給多所全活里多弊役釐之使無偏累困者以蘇人文久否加意培養其獲雋者皆所首拔士觀察使者廉知其賢輒示為通省式以母韓氏憂歸慶人建祠以祀後崇祀學宮按叙州府志有才大學充氣平量闊作士多有興起救荒全活億兆語自漢迄明名宦僅四人而棟與焉服闕補閩松溪令滌煩除苛士民感悅著碁化錄以紀績甫八月陞薊州守薊三輔重地民氣

新昌縣志卷十一

人物 明

四十七

頗囂以振厲兼撫循人心大肅無何以越獄事改道州至則修濂溪之學顏其堂曰守拙政成民悅以為亢宗次山再見云又以母蔡氏憂解任州人鑿石以紀善政凡二十有一起補趙州趙民向疲於衝當事動以民力媚璫人心如沸梗抗不奉命未幾左遷漳州府判漳故多豪右棟以雅靜鎮之人皆歛手視篆海澄有洋稅積弊非一端條十議鏗為成書商人感德以檀肖像而祠焉雲霄鎮舊有城堡已復於隍畚插苦無貲搜剔豪右所蝕者為之修築民用貼席居鄉以俸餘遍給親族置祀田以永孝思所著有風萍集宦遊諸草與龍虎上將軍小齋先生甲軒公稿並梓傳世原政績傳

呂仲春以生員入貲補太學生授蒙自縣丞署邑篆拓民復稅修學興文植柵鷄獺獾諸洞獠叛當道檄勦之克其二寨乃親抵賊巢諭以禍福衆感激聽命居太學偶收得千戶侯女善視之長以配名家子焉

原例貢志注

呂和筠字六符明末補邑諸生性敏悟博通經史幼隨父宦閩父病侍湯藥衣不解帶者數月及父卒於官數千里扶柩歸哀號不絕聲見者驚歎事母曲盡子道終身孺慕不衰視兄弟子如己子年方壯絕意進取或謂子先世積厚德後必有興者況才如子乎笑答曰人各有志不可強也居恒備述先人遺訓誠其子秉夏音輩曰積德生富貴一人可延數百世富貴不積德數

百世卽衰息於一人爾祖之言也若曹奚事遠師古人無忘祖訓可耳生平和而介好施重義然諾不苟有古人風

原孝友傳

嘗集

諸家詮註經史參以獨見多前所未及

由府志增

又和鼎字銘躬弱

冠補諸生文名籍甚父卒於官號慟瀕死者再事母孝所居燬母命親構諸弟嫌已基隘慨然與之與朋友交緩急可恃早喪配僅一子不復娶口不談人過所著有四書直講尙書指南西園文集又和朝幼時善詞章聲律爲諸生尤孜孜嗜古每落筆獨樹一幟爲知名士繼求理道嘗著周易註解融貫時雲間王先承及江左吳趙諸賢樂與之交性孝友童稚失父母以老病藥餌親嘗閱數月衣不解帶母故哀毀骨立親屬戒之曰送死



固大事但爾形勞容悴當節哀竟以毀卒

均孝友傳

呂奇策字可獻號金門敏悟夙成過目輒成誦品格軒朗不立町畦篤於孝友兄弟皆仰給焉萬歷癸卯領鄉薦己未登進士授行人陞工部主政魏璫勢烜赫或勸之趨謁臺省可立躋則曰寧失官此膝不可屈也風節矯然竟忤璫謫福建都事後璫敗召補秋曹轉司馬郎時京師戒嚴策調度有方擢淮安守剔弊蠹革陋規剖決如流人謂之順水船淮爲南北轉漕要地料理悉得機宜藩府經過中使需索毅然不應卒以遁迹去一郡以安後歷廣東南雄府到任卽辭歸歷任餘于南雄淮安皆肖像立祠祀焉

原政績傳

新昌縣志卷十一

人物明

四十九

呂治號弦我官西蜀保寧府幕剛直不阿視篆閩中復署南部事前後三載餘一以清白自持邑有顯者其弟殺人欲枉法以徇治不爲動又行重賄持之益堅竟抵罪輿論快焉奉御史牒查核州縣無纖芥私咸敬憚之後以忤勢左遷藩封散秩遂掛冠

歸

原政績傳

呂該字廷兼弱冠善屬文邑宰聞其名召補弟子員托疾力辭作苦梅吟見志益肆力於六經爲詩文頃刻立就草書駸駸逼古性謙和端直閭里有不平聞一言輒解御史王潢鐫其名於旌善亭晚避鰲峯萬山中著萬峯稿二十卷

原遺英志注

呂新周號嶰谷生有異徵穎慧夙成髫年端方愿慤家學淵源經

史百家無不淹貫萬歷丙午膺鄉薦以南宮屢躋授滁州喜曰此歐陽文忠之所守也下車洞悉積弊惟養馬爲害最大周爲均貼分派富民不得詭脫貧戶始可甦息立碑刊爲永例其窩盜窩訪者有天罡地煞之名悉廉而置之法奸黨遂散來安有錐子會以利錐錐人強劫其財爲誅其首惡滁民德之立祠於醉翁亭畔又立祠於瑯琊寺歲時祀之天啓時魏璫勢熏灼阿附者欲爲立祠以滁爲首力持不可人皆危之周執之彌堅事得寢而魏璫亦敗咸欽其鯁亮之節焉入爲大理寺副多所平反左遷居庸別駕監督中官怙勢索癥公嚴於視躬查盤州縣餽遺悉却卒無隙可指反加敬禮及暮以薦守莒州又喜曰此

子夏所宰之莒父也力清衙蠹盡除宿弊爲奸宄所憚有稚子葛明煌其父爲仇家所害稍長手刃殺其父者自繫於獄案歷年不決公援漢唐報父仇之詞引經斷獄遂得免釋左遷淮府長史慨然賦歸作糜以救饑者家居唯吟咏不輟尤長於行草書著有來滁漫咏堅匏瑣言已刻行世

原政績傳

呂曾蟠仕平湖訓導幼年父亡事母張氏極孝制行端方博學雄文生徒數百多知名士及司鐸善誘名碩類出其門

原選舉志注

又

曾樛字少鵬少豪邁不羣稍長輕財重義制行如古人錢塘渡口賈客遺金數百樛投寓守金經三晝夜俟其人還之凡里中窮乏無告者輒傾囊以贈性嗜書於天文曆數兵法靡不通曉

然深自隱約不輕以炫人會稽念臺劉先生與爲忘年交序其詩集云呂子少鵬慷慨激烈發爲詩歌直逼楚騷晉魏不足多也游歷徧江南北每與其地之賢豪間者定交家居課二子爚爇擇史書中古人行義最高者手錄受之甲申聞闖變憤慟累月家人止之勿得後避亂山谷中或歌或泣中夜數起以此抱鬱而死其磊落忠義之氣不可磨滅原義行傳又有其家曾標者居家篤孝友與人交崇尚氣誼博雅嗜古文追大家聲馳藝苑性伉而摯聞闖變悲憤成疾遂不起一時稱其義烈原義行傳王坦南山人少有隱德長好學慕古富於貲而能推有餘以調困乏性行質直鄉人有爭訟者輒爲解之頗爲詩文尤精於醫術

新昌縣志卷十一

人物明

五十一

邑令屢禮爲鄉賓其子世儀由庠生入貲補國學誠篤不欺司成呂公枬甚器重之官知事有清望原耆德志注世儀亦仕至四川

司按察司知事先是有揭名於亭者爲潘淮卽晟之祖亦以事

繼母孝撫幼弟溥恩善爲人息爭聞其銘詞曰謹厚持身義方

教子

原耆德志注

又有俞彞四圖人亦以博覽經史與族黨有恩稱

原遺英志注

潘復敏字存功號姥白萬歷壬子舉人後授廣東韶州曲江令甫蒞任見江水泛溢湘江門城址水齧殆盡亟爲築石三十餘丈以防之邑東鄰南雄多水盜行旅道阻爲設哨船撥兵循環警備盜乃屏跡又預備火藥人謂之迂旣而上謁撫軍卒有楚寇

數千破樂昌突圍韶城聞報卽請兵赴難決圍入守出火藥鑄鉛丸率居民厲士卒晝夜拒守閱七日而賊潰斬獲數百人追散賊黨一郡以安邑志殘闕親爲纂修燦然可觀秩滿擢姑蘇治中除耗剔弊新政甫行以前不媚上官爲當道所媒孽解職而歸天性孝友與人和易且博學瞻聞遭兵燹家業蕩然怡然自得以返其初服爲幸焉

原政績傳

章泰亨字履安號來陽萬歷己酉領鄉薦爲孝廉二十餘年絕跡公庭有邀以竿牘者必正色拒之居鄉謙謹人無不敬慕焉就分水教諭與諸士文行相砥礪捐俸修五雲山舊址嗣後登科目者相繼不絕陞廣西武緣令壤接交趾多金錫珠犀之產澹

新昌縣志卷十一

人物明

五十二

泊自矢一無所取吏民畏服每歲霜降時里民必獻常例五百金卻勿受且聞諸臺省置碑永禁其俗訟者兩造各數十人每名必先輸紙價然後質皆爲之痛革歲餘民俗一變監司吳思溫以清介聞時目爲海忠介一流特器重之丁外艱歸行李蕭然爲人儉樸蔬布宴如常曰清約二字傳家寶也

原政績傳

又爾弘

崇禎壬午科舉人鎮靜寡言笑風規岸異雅不好名常賦詩以

見志捫蘿垂綸自儼一眞子云

原選舉志注

陳九級號雲峯力學嗜古萬歷丁酉舉於鄉授海鹽教諭多所成就陞雷州遂溪令雷爲烟瘴荒裔且濱海颶風時作民無寧宇地異俗殊厥治惟難級至豈第宜人耕耨以養庠序以教因其

勢而變其俗政成民悅祠祀至今

原政績傳

又有鴻藻字伯華天啟

甲子舉人性通敏爲文援筆立就持身謙厚有應世才惜賚志

以歿

原選舉志注

陳應奎性行淳篤涉獵經史入貲爲太學生後歸榜所居曰衡門

讀書談道其間所著有道統管窺衡門吟邑令鄭公有名儒高

山之獎

原例貢志注

宏球字元聲好學問敦行誼言動準古人不營

利又能周濟人少遊邑庠閉戶讀書著有四書旨說尙書纂序

授徒累百嘗設教雲居寺是歲丙子冬游饑館穀盡給貧民及

歸囊橐蕭然勿計也又有人誤以其名呈學學師叱之曰此生

篤志足跡不履公庭汝必誤矣及訊其由果誤其人愧謝球不

新昌縣志卷十一

人物 明

五十三

之較焉

原義行傳

俞應哲字若明號龍岳穎異絕人精於詩畫書法尤多纂述萬歷

丁酉選貢授四川江油令申移學宮創堰渠均馬戶作浮橋嚴

鄉約等績有五申除主簿除鹽耗革協濟除民夫社總等弊故

五江之民立石誌之秩滿臺使開薦哲拂衣歸里築無生館讀

書其中屏跡公庭優游三十餘年而卒所著有字解古姓韻編

一絃集衡岳朱公謂其胸羅牙軸筆擲金聲蓋不誣云

原文學傳又

有應星嘉靖甲子舉人襟期清曠任六合縣尹緝獲巨寇紀錄

方半載卒於官士民助賻祖祭流涕應肅萬歷丙子舉人甫七

歲能聯句人皆驚異弱冠果雋尤精書法珍重一時未幾卒咸

惜之

原選舉  
志注

俞則時居高桂溪濱性好施予捐田十五畝爲庠考校費嘗娶側室詢其舅爲父友委聘還之若捐田以厚大宗祠購山以衛先人隴買地葬姊奩嫁姪女而不受其聘不計利不沽名者類如此邑令曹天憲宋賢以郭元振擬之徵爲鄉飲賓尙書潘晟有傳

原耆德

志注

俞夢盛字惟美選貢任陝西金縣令性孝友母鍾愛其兄曲意承順凡館修廩餼所入悉以聽兄而已無所私蒞金邑廉公惠愷以忤當路謫寧國府授途遇劇盜曰此吾仁慈父母也戒毋犯且護出險在寧課士以敦修實行爲務改山左威海邊隅寡文

新昌縣志卷十一

人物明

五十四

教日與諸生橫經講藝寒暑不輟以勞瘁卒於官蕭然一室士

民釀金以斂

原政績傳

又夢禧任福建汀州府經歷署寧化縣事遇

荒捐貲賑濟民皆頌德

原選舉志注

俞志虞

父時舉入義行傳

字際華號華鄰中甲子舉人崇禎甲戌成進士授

四川順慶府推官政尙寬簡或謂司李刑官也况治蜀宜用嚴虞曰蜀當奢酋構逆民力旣殫僅存喘息譬之久病初起須補益元氣用峻利之劑可乎獄中滯囚詳審再三囹圄一空性復愛士以文章求教者與之議論娓娓不倦詩辭酬和有松韻集梓行丁丑流寇入川道經順慶紳士會議欲糾集民兵堵截虞曰不可寇今深入必有大批追蹙此窮寇也若驅鄉兵格鬪是

謂棄之惟登陴堅壁以守其勢斷不敢久頓也未幾而督帥果

領大兵至

是時督師洪承疇曹某二人

見其鎮以寧靜喜甚為特疏題叙時重

慶闕李官郡民控院求調虞於例弗合衆懇求不已乃令兼攝

之兩郡民士爭迎於境至重慶卽以治順者治之頌聲大作秩

滿召對平臺親策治邊弭盜數事條對中旨授貴州道御史清

查度支侵耗疏參大司農得旨為之罷斥

七卿表十五年二月戶尙李侍問十六年五月傅淑

問免未知此司農為何人

復上安民輯盜選將練兵任賢屯田等十餘事言皆

剴切

崇禎長編癸未十二月丙子貴州道御史俞志虞疏奏略曰向者風霾蔽

痛加修省邇來寇亂民災汙決兵譁其象為蠱元臣怙寵督撫貪懦其象為蒙派  
徵輓輸扣抽剋減其象為剝借劍埋輪燃灰附暖其象為否糾參乖和分門別戶  
其象為睽諸如此類皆陰陽之搏擊不調故其感為震雷臣願在事諸臣大者自  
省引不樹交斥不代異小者自省議者持平任者肩難皆切中時弊帝採其語命

新昌縣志卷十一

人物 明

五十五

所知

奉命巡關入境密詢有跋扈渠帥縱兵恣橫又有管餉主

事泄泄不前多染指並疏彈劾卽奉嚴旨削黜直聲愈震羣相

告曰此鐵面御史也有大帥以貂裘良馬來餉卻勿受復嚴諭

其使邊塞為之肅然特疏奏吳元戎

當卽三桂

稱其出自將胄諳韜

畧英勇可重用從之向例巡關必東巡畢先報命次西巡乃於

甲申二月杪入都告事竣三月間闖警逼吏曰急出巡難可避

也公正色曰吾聞以王事死未聞假王事生十九日城陷投環

垂絕幼子慎憲泣解復甦厲聲曰忠孝一致我不忠卽汝不孝

憲曰君臣大義兒豈不明職在巡方或潛出領各鎮兵謀報復

於義更正繼探得聖駕已去公始首肯忍死以俟二十日知殉

社稷遂望闕悲號絕食露處二十三日大行梓宮出殮東華門

匍匐大慟觀者詢為關院皆錯愕遂潛至新昌會館縊焉原志公曰

我分當一死不死於宅而死於館母使賊知有我顯與上語氣不合毛奇齡傳初將自縊其子泣諫以未知駕在何所探而後殉未晚志虞唯唯然已不食坐露地梓宮出東華門匍匐往慟夜遂縊於館衣有紙云吾不死於院而死於此吾已在巡且恥院中有此官也省志引之與此少異是皆未知當日形勢公哭臨時必悲憤交集刻不欲生賊踪已散滿安有委蛇餘畧可以歸宅還院館距東華門較近且免家人聞見故便道直入殉義所謂急何能擇如二傳所言意在裝點從容適滋後來謠詠今皆不取

福王弘光元年贈太僕少卿賜諡節愍附祀孟章明等七人之列或謂為土賊所殺弘光實錄鈔或謂為拷掠而死國變難臣

鈔輾轉傳訛已自相矛盾要其官守有在臨難不去殉國之志蓋已素定乾隆四十一年賜祀忠義祠追諡節愍適與福王同一洗羣疑百年論定後杭人於西湖建祠與倪施諸公並祀公

新昌縣志卷十一

人物明

五十六

論益明由乾隆府志增子慎憲字興茲性篤孝友髫年補弟子員隨父

節愍公任蜀中司李值夫人呂隕於署扶柩數千里以歸峽道艱險劬瘁備嘗至公歷官關院鼎革殉難憲於顛沛中仍星馳扶櫬還里請諡建祠真可謂忠孝兩全矣原孝友傳

張世賢洪武初任監察御史立朝忠梗時大臣郭恒坐贓不法逮捕者甚衆世賢上疏極論謂不宜濫及無辜上怒其為諸人遊說遂謫雲南後卒於途同時有德規仕刑科授給事中時有小璫盜內帑錢德規論寘之法中貴啣之切骨中以奇禍竟下於理從子文哲於其叔以直言獲重譴時逮及其母文哲大慟曰人臣以忠獲罪夫何憾但祖母以垂沒之年經此慘毒吾甯忍



見之乎即捐軀以從吾分也遂不避艱險奉祖母進京竟以道

卒

由採稿  
補遺增

章咸亨字无我號夢痴改名夜別字無礙頭陀明末歲貢生自幼孤介不屑與庸兒伍爲文章蓬勃有生氣明亡公聞之仰天大慟欲死者再三嘗自吟曰只有寸心難刺血更無一事但傳經有告以史可法尙奉福藩於江寧不如姑忍以待乃遂拔髮狂遍訪殉難死節士旣而杜門謝世爲衰麻小影自題曰蓬鬆其頭偃蹇其態面貌醜惡心性潑賴知我者謂我心憂不知我者謂我作怪人棄我乎我初不樂乎人之中天厭我乎我正欲遊乎天之外遽遽乎栩栩乎噫嘻無礙無礙及卒之日戒其子

新昌縣志卷十一

人物 明清

五十七

于濯勿以所爲暴於時

由採稿  
補遺增

清

呂正音字五正號夢軒生而異敏祖父器之弱冠補博士弟子員年將五旬識者惜其久不一遇正音怡然曰窮則獨善士之常耳順治甲午乙未聯舉成進士所親多爲之喜正音謝曰吾輩一生力學豈爲博科名計耶其不芥帶得失有迴異於常情者初任山東昌樂令興利剔弊政簡而嚴邑以大治朝廷以內吏著外吏之表率亟欲得循良卓異之士而用之正音蒞昌甫七月廉聲上達遂破例膺內召去昌之日父老遮道攀轅悲悒如嬰兒失慈母

原省府志將赴都之行資戒期不能  
發父老爲治裝悉謝不受典衣而行

迨陞見授戶曹主事

未幾典權鳳陽至則革火耗汰濫役惟惠商裕課是念商民靡

不感悅總漕林公特疏薦之注上考遂任寶泉局督理省府志謂所任皆脂

膏右往例卯限銅觔千萬匠頗多而坐糜廩餼故掌局者嘗或

附鑄正音白部堂按卯增鑄有裨國計爰著為令丙午奉命主

廣東鄉試偕同考官矢公矢慎務拔真才一時知名士咸與其

選貢舉年表康熙五年以戶主典試其副即戶主福山王鷲題為民之所好好之論領解為游定海既而遷刑部郎中凡

讞重獄多所平反冤者獲釋都下相傳有得遇呂郎中冤囚無

死法之語然獨於怙惡輩毅然不稍徇縱嘗會審提師某原省府志

為哈喇庫酷掠民婦一案衆方瞻顧正音奮袂掀髯竟謫發其橫

暴諸狀師以折服而被掠者悉得放還秩滿陞江南徽寧道徽

新昌縣志卷十一

人物 清

五十八

寧兩郡阻山時因裁去監司奸宄竊發守令莫能制江督請復

道員以整肅之廷議擇德望素著者正音因有是命省志以江西僉事分巡徽

寧府志以江南按察司僉事分巡徽寧下車制禦曲當纔閱月萑苻革面

四境帖然顧其俗險健正音一以德化之數年之間民風不變

幾於無訟後來撫軍者但見地方宴然無事而不知其銷弭之

力仍請裁缺特加正音朝議大夫叙功另補正音甫歸里而兩

郡之盜又充斥矣其去留所係如此居鄉醇謹下人力行義舉

年七十五卒於家生平孝友質直不帶浮飾持身涉世一本至

誠雖極狡黠之徒見之咸服其表裏如一學者稱夢軒先生原政

績傳今由省府志增節世又謂其博通內典與緇流結方外緣所到名山谷

剝題咏甚多法類董華亭嶠沃土得其片紙珍若璆琳由越風增

俞心聰順治四年歲貢仕廣東茂名縣令陞陝西平涼同知稟性

純粹與人和易時人服其雅度原選舉志注

王性之順治十年仕河間府吳橋縣令博學多聞賦質高雅居官

以愛民為念不事權貴有古人風同上注與評本孝友傳同名未知即此否原名宦傳其父新民在明末以

邵武籍授新昌丞遂家於新以子貴得封必此人也

潘志麟順治甲午仕台州太平訓導天性孝友當舉博學宏詞時

巡海軍繹騷縣令以諸務相委日夕經營以勞卒於官由選舉注增

陳捷字穎侯康熙己未進士改庶吉士授編修省志引鄉賢留祀冊載捷處兄弟同仁均愛嘗

道拾遺金訪還失者捷言詞澀訥終日不發一語斂容危坐凝止如山而溫

新昌縣志卷十一

人物 清

五十九

粹之氣溢於眉宇見者無不愛敬丁卯充河南正主考康熙二十六年丁卯

主河南試副為中書臨川曾應星題為好仁者無以尚之四句次為言而民莫不信二句三為聖人之於民三句解首則固始閣應爵時有大學

士暮夜遣要人輦黃金至寓所求關節捷峻卻之要人曉譬百

端三至卒不納乃悻悻去捷入闈精心披閱夜漏不五鼓不休

稍偃息即篝燈而起榜發中州宿學俱獲選所有墨卷至禮部

為天下冠無可彈射者而捷三場發策溯伊洛淵源以及濂溪

有二程見周茂叔吟風弄月而還司磨勘者謂纖小非考官所

宜言遂鐫級歸捷畧不表白有問之者輒以他語自咎惟日事

讀書年八十三卒捷幼孤與母呂氏備嘗辛苦及選詞林即請

假視母越數年一奉試命及期而還其養親極孝而建宗祠修

族譜皆獨力成之蓋篤行儒者也

志稿由原郡志增

呂燦字蓼懷康熙己未進士除灤縣知縣徵拜吏科給事中遷兵科給事中康熙丁丑會試充分校官燦骯髒以氣節自負好抵掌論列國事山西巡撫贖貨下吏承風肆侵漁燦抗疏劾之俱得罪去御史寧爾講者意有所報復以浮詞攻燦燦亦拜章白

明原疏畧曰為辨誣劾奸仰祈天斷處分事竊臣三年外吏四載家居今謬側山西攤派賊盈百萬兩所當追究奉旨該部嚴察議奏一為嗣後行取官員虛革虛降事完開復者許其咨送奉旨知道了該部知道忽有臺臣寧爾講疑臣賣本行私遠行糾參品行名節所關死不知目不敢不辨據云臣上本數日之後長安關傳賣本關傳者何人說合過付者何人又云臣憐然無覺為人所給為人牽鼻給臣者何人牽臣鼻者何人不一指出若憐然無覺則不能賣本若賣本則非憐然無覺種種虛描懸揣陷人以敗行之事雖愚懦亦何能甘心且臣原疏言嗣後者下次行取之謂也徒費銀錢買官嗣後兩字此理之顯然明白者也至於於臣所題山西一疏已奉旨嚴察議奏而爾講參臣疏內一則曰言人所難言再

新昌縣志卷十一

人物清

六十

則曰往返駁查豈肯承認後當不至坐言官以言事不實此其抑揚批駁甚覺無謂或渺視嚴察之旨為不足行耶則為不敬或唆指贓罰之多不必承認耶則為不忠顯誣言路之實本陰解山西之濫征受人囑托有為而言殆不可測臣於三月二十一日見其急暴即勸之日天下之事平氣以處之從容以理之無太驟無過激爾講口雖極贊此言已拂其意不滿旬日臣即具條奏一本爾講又疑有意誘之使落臣後也及查其參輔臣李某某因上年為伊子寧倬以招民知縣納先用借銀不應以此含恨也參部臣翁叔元因康熙一十八年朝廷起廢左都臣徐元文擬舉李時謙張元美寧爾講三人叔元時為工部尚書以爾講多事恐不便遂中止以致怨也參張元美寧爾講三人叔元時為工部尚書以爾講多事恐不便交元鰲轉致我郊彼時我郊以銀數不足回覆怒我郊並怒元鰲也顯前倒後指東證西內外大小官一網打盡使人畏懼為御史者如此則國家言路何由清乎閱其參疏內首言正心誠意又追叙當年放火大案八旗動搖賴其安定三桂勦滅屬其功勞獨不思逆藩竊據皆皇上聖武指授機宜而爾講一筆抹去歸功於己何病狂喪心一至此極耶臣按爾講本一貪淫險躁無忌憚之小人臣請為美皇上陳之其巡鹽兩淮在郝某某捐課前數十萬之羨餘盡行肥己廣置良田美宅精築宜園飲酒作樂變童艷妾列郡間居正心之學問不當如是又聞其進京沿途恐嚇過定州怒州守于琯薄待即對涿州守李成龍言如此官該撫如何不參李成龍白之直撫沈某某甚為驚懼在京旗員于珩乃珩兄現任將煙過保定噴守道于準程儀不厚而叱其放官不好彼時口中吃煙亂罵大嚷將煙袋擲地抵京米舖之前寓所赴席開樽殆無虛日製有餘酒詩深贊戲曲寫斗方

於妙光閣上既上參本回思所爲急行索取已爲人揭去今喚住閣僧人嚴諭如有問此詩當答以二十年前所作僧懼罪唯而退誠意之功不當如是也閱其參疏內五款一朝廷之職在擇相一六部之振刷宜新一言官之不肖可駭一督撫之溺職亦有一光棍之包攬不可不處夫以大臣而與光棍雜於一本糾參也已傷國體更以朝廷之尊加一職字下同臣民並列五款則不敬之大者也律以無將其罪當誅爾講身爲御史假道學之名肆梟張之技臣若一避報復之嫌嘿不糾察則僞學日以盛言路日以濬臣所以冒死辨劾字多逾格

貼貫難盡伏祈皇上大張乾斷立賜處分爲此具本謹題請旨

上命九卿

大臣廉其是非衆不直爾講爾講憂怖死流其妻孥於關外爚卒無事未幾復糾山東按察使貪耄會有庇之者坐爚妄言罷職逾月而臬司果以老病死矣爚性好施與得金錢輒隨手散盡至其窘時或不能舉火已小饒復揮霍如舊親愛者引前事規之爚浩然不顧也年七十五卒於家

由志稿原府志增節

呂邦澍山聳先生九世孫也幼穎異文思極敏一日可成六七藝

新昌縣志卷十一

人物 清

六十一

嘗手錄四子書諸儒註疏傳說并通鑑全部年五十卽充恩貢暮年選瑞安教諭大吏問年以實對遂雅重之八十二告歸邑生以詩餞者二百餘人壽九十子仁學行如其父學使者案臨溫屬新昌學具文以仁充歲貢邦澍親爲送試學使詢爲父子深加獎賞後選開化訓導大得士心五年致仕多士亦爲繪攀轅圖並生祀之原志編入宦績傳有古道照人詩文外不談阿堵等語壽八十有六父子皆四世一堂仁孫司壘亦由歲貢官仁和訓導年八十三告歸壽及九十三世皆以明經任教職又皆耆年碩德爲世所罕見

何世華字盤山康熙辛卯舉人雍正甲辰進士任山東壽光縣知

縣勤於課士又捐俸設義塾雖鄉僻亦延師教之獄訟因以減少縣中陋規不一革除淨盡以蘇民困聞壽光人尙祀之名宦有傳

張阜字元康號見虹邑庠生雍正元年奉旨薦舉孝廉方正賜六品服雍正五年又以賢良舉奉諭旨薦舉由府送司各賜以文策一篇亦彪炳可觀督撫皆許可時督學適兼理觀風整俗使事提疏稍遲六年六月始引見以教職用授處州景寧教諭著八行楷模錄訓飭士子買地設立義塚居官七載亦有聲

俞鎬字西厓乾隆乙酉拔貢生歷仕江蘇無錫南匯上海江陰等縣最後授山西大同縣不一年卒於任公疆幹練達官蘇時庭

質兩造不用胥吏傳言曰吳越一家那有語言不通在無錫一日捕廳拿賭犯五人其三人則以賄釋放矣以二人送縣公問曰賭伙只爾二人乎曰獲有五人太爺已釋三人公曰他釋三人吾亦釋二人爾等去罷一時傳其事以爲識治體在南匯有牛路過突與賣油人遇油被傾覆遂控牛主欲令償公曰是牛之罪吾且笞牛邑人以為奇羣集而觀之公遂令闔門勸觀者各輸一錢以爲償油費各一笑而散在丹陽辦南巡差尤能不擾民丹陽人爲立生祠水旱病疫皆禱之稱曰太公至今香火猶盛子際堯號盛斯從子勸堯號北屏鎬官江蘇時二人俱隨學際未冠邑院試皆第一積瘁成疾生母痛惜之不令習舉業

勤性本喜古文以故二人自相切磋時乾隆中葉江南北人文尤盛二人隨宦所至與名流倡和無少屈惜所著多毀於兵燹有傳其兄弟分拈多字韻詩際云酒從醒後天將暮水到澄時月受多勸云已去光陰流水速未完心事亂山多雖僅一嚮亦足見二人性情所在晚年家居皆爲鄉里矜式

詩見續兩浙輶軒錄

呂日永號午亭乾隆戊子舉人湖北穀城縣知縣丁酉庚子分校楚闈主試嘉其得士歷署襄陽德安等府同知性鯁介仕未三年不能媚上游辭官歸里囊橐蕭然惟以課子訓孫爲務子山臺孫文梁曾孫欽典俱以明經有文名

梁敦懷原名家號素園後以字行彩姻鄉芸溪莊人祖雲章歲貢

生父鰲邑庠生父遊學在京少寄食於外家已有子矣父入永平官吏幕挈之往知府李奉翰素精相術一見奇之勸母學幕職當別有就同族文定公國治乾隆間名相也曾來新祭祖稔公家世時以湘撫入軍機會四庫館開需謄錄公父率至京謀於國治適額滿僅以供事保送遂留爲館客議敘得選四川金堂縣典史時年已三十有四二年署梓潼丞乾隆五十三年廓爾噶事起奉檄至軍前差遣中道以事平回任五十六年西藏用兵又赴糧臺差得獎敘以冕寧丞署洪雅縣印縣故有田河流急被齧公糾士民堰之成沃土會名山起水二縣令以供應兵差誤撤公署任兼理站事益器公才嘉慶元年升任太平縣

時鄂陝等教匪蔓延及川東雖勦撫兼施之詔下而匪蹤飄忽無定雲陽當其衝檄改任由間道方達已焚劫一空公於撫卹中兼籌防守期年立寨堡至六百餘以糧米分貯既免侵掠又省轉運軍需得以時應經畧益喜之下其法令各站仿行初匪於大軍追剿卽散竄軍過則回匿山峒復出劫掠零星小股以百計中惟張長青王國賢二股各有數千人尙往來三省交界中公任雲陽旣四年民亦苦亂離益匿就公饑則爲貰軍米以賑屆期完償無一欠又復建書院以教其秀者以故上下益聯合張長生者長青弟固雲陽民也以病爲堡勇縛送署公獨優養之長生益感激公從容詢問得其情長生言惟懼死不敢降

降亦恐不免卽民此出尙難違論吾兄公卽如約命出飭各寨勿問衆疑之數月突有大水田寨長陳世輔稱有賊目陳求榮率四十人奉長青命來詢撫事公卽命見之一如語長生言求榮猶以兵在境內爲疑公率同來四人詣夔府督軍行轅伸前請亦以受降如降敵爲戒公回逕趨寨中長青以五百人在附近無量山阻險觀望卽由求榮申諭先繳器械許以不死羣感泣遂率以見制府此爲第一次王國賢在逃由長青輾轉尋獲招降至八千餘名此爲第二次川省於是報肅清經畧亦獎許交至仍回本任理善後事所有虧缺概由民自完蓋德公有素焉由眉州知州奏擢綏定府在眉時以生童向附嘉定府考試



路遠道險請由州設考棚皆允准三百年來此舉由公始未蒞綏定川藩強資之以引見公年五十八歲方再赴京陛見時猶以雲陽招匪事爲言詳詢善後機宜并及新兵滋鬧事公再請免其攤扣從前借支銀兩得旨允准川遂無事未數月回卽任鹽茶道十三年升桂臬時年六十一歲陛見時又溫諭久之令趨叩裕陵公以在雲陽時兩次丁艱昔惟墨經今當補報爲請遂乞省墓假上因思及國治旣歿爲伊一家令便道看護并令卽日首途如命行赴任未三月調滇臬中途至馬龍州卽升任藩司釐定運銅規制官民稱頌三年復請陛見耳已重聽蒙恩仍飭回任又二年公年六十六歲內調太僕卿以桂臬有失察

事予休致公少落拓中年始達其家藏有雲陽招降圖爲政績之尤著者

陳榭箕字音選性淳厚侍母疾彌月不解帶父病册祝以身代尋愈特愛之甚析產外獨昇金五百公不辭退仍與伯仲平分焉讀書通經史獨於關洛書且讀且思及觀近思錄悠然忘食寢以庠生食餼作文意在明理不屑屑於華藻居鄉多所拯濟辛未庚辰間歲遭旱曠爲粥食餓者不足則遍勸姻婭使各贖金繼之又爲平糶法遠近全活者數萬家董南明書院事出已資置几案累數百復捐私田備日後繕修費邑故無試所公倡捐合資庀工建數十楹於祝釐宮側士庶由是感奮絃誦相接尋

循川楚例署泰順學篆學祭器多窳捐俸新之縣有羅陽書院田故隸於學前訓導多侵之公爲申憲歸之書院且爲善後法樹碣焉去官日邑人士攀轅不忍釋驢送行册以志愛慕旋改安吉學復於其縣書院增置公田一如經理南明時事公雅以道自任秉鐸所至輒教以孝悌忠信月朔冠帶擁臯比講經一通抉性理數條爲之反覆推詳家居後教子弟日益嚴雖三子寮爨四子濟爨皆已成諸生次孫于垣亦舉孝廉猶日有課程輯義訓錄使誦之稍懈夏楚不貸年七十卒前數年朝廷廉知公德行以隱逸徵不起及卒敕有司崇祀於西學私謚文惠長子宁爨字辰鄰號笏山歲貢生著有駢體文集山川考古錄高

人高僧考及詩薈局促芝吟館詩集沃洲古蹟圖序行世次子榮爨文苑別有傳

陳金鑑字介鏞號蓉臺質實端重行方其軌少孤育於寡嫂呂氏貧不能讀挾卷而樵族人嘉其志共成就之年十四始專志向學以拔貢生舉於鄉道光乙未年五十八歲始成進士皆以經策取勝未第時以艱於往返留京館於諸城劉氏時雖顯赫及此未一往遂以知縣發山西卽用先署潞城曲沃繼授黎城首建義倉百廢具舉敘修城功大計得卓異而公遽引年歸著有四書說易書詩三禮三傳周禮說謚法解補五馬山樓詩文集外有舊志評本雖未成卷帙而於古今同異及沿革源流言之

鑿鑿詳今志原始卷中孫維翰本名壽玉父文學星秀早歿學問一如其祖且以孝謹稱應縣試屢得第一李令突於通案中改第二以病遂未入院試又因訟累幾毀家同治元年寇氛熾適偕幼弟志玉奉祖母及家人避難山鄉中會其族兄壽亭率以攻城賊均爲賊害年僅二十八歲以布理問銜贈雲騎尉世職詳忠義錄其妻梁氏歸守貞另入列女傳

俞貞由舉人挑一等仕山西歷繁峙寧鄉等縣仁愛及人循蹟卓著兩校鄉闈所得皆知名士歸田後宦橐蕭然開館授徒仍如儒素焉長子鴻達亦由舉人挑一等籤發貴州補授開泰縣開泰爲黎平埒郭邑號難治公寬猛兼施民甚畏服邑有重囚堅

不承左證確鑿據以定讞檻送會垣道出其村其家囚證者甚謀要殺之公知之命其證由別道行而後遣囚經其處果噪而起旣而見爲囚謀遂沮郡屬有會匪盛徒衆欲乘學使案臨時起事公知之以彈壓試事爲名請兵於觀察使而大張文告預發其謀匪知有備謀遂寢值萬壽節郡中演戲慶賀僚佐羣集太守狎伶人公責以何地何時太守愧無對罷飲於是公任開泰三載矣以觸上官怒謝病歸公長於教育從遊者甚衆十年中七掌本邑書院在黔人士亦多所造就同邑如梁進士葆仁黔如孔太史繁昌等皆其尤著者

俞汝本字秋農祖朝妥明進士官至工科都給事中詳本傳中九

傳俱以青衿世其業汝本少知名館杭時爲許張二氏諸伯仲所宗中年始以廩生通籍丙申會榜第十名分發貴州卽用授鎮遠縣歷任貴定婺川天柱洊升獨山州知州委運黔至京事竣調牧黔西未滿任而卒其任所至皆愛士崇厲風教善爲民興利貴定邑城圯力請重修躬自督察撫勞交至期月卽竣事貴定故僻陋士子逢省試每以乏川資中止特於勸課之餘優給膏火又爲籌集寶興費著爲例三年後士氣始振婺川土宜桑卽教民栽種法并設機織局使民自出售得利以鼓勵之不宜桑者則導以江浙瀦水法民益樂從天柱無書院爲勸募重建定課期增膏火一如貴定時黔西一老儒年已衰矣特置之

前茅曰吾以勸讀書種子獨山州有十栢山房爲陽明先生舊游故蹟向祀之而棟宇欲頽獨率州人修之落成日適黔中名宿鄭珍至因與祀焉一時傳爲盛事珍卽黔闈分房所得士餘如道光丁酉己卯癸卯三科中所得亦能文者多陳浚經學尤居首著有惜分陰齋詩文稿及聽秋聲館詩鈔退思堂雜著等已鈔版長子邦燾字西垣以雲南永昌軍需議敘布政司經歷仍分發貴州試用時境內未靖三足屯地會匪楊元寶聚衆蠢動大吏委本道查辦檄邦燾同往獨平允衆爲飲餞至勒石記其事次年遵義桐梓咽喉匪楊隆洗惑蜀道人言遂起事縣城破以數萬衆圍逼郡城督撫提鎮皆往援糧運在前敵爲難邦燾

力任之郡西北道險方倚團首王安國爲鄉導安國與隆洗有舊忽貳於賊暗以情通惡之益生變思得一人招之反正營中數十員皆面相覷無一應某太守知邦燾果敢強之往逕以單騎隨侍者二人赴堡中迎者持械以千數安國初尙匿不見聞只三人始出營中遙望之至去後十日無一信息以爲死矣邦燾忽仍乘馬疾還營得其要領而歸上下俱嘆服以是遂得平隆洗論功晉知州邦燾學本於父而才似過之以勞勩卒於軍年僅四十其子伯旭字芹觀亦能詩嗜金石工篆刻同治初任思南府經歷足跡幾遍天下訪舊至婺川於一故家書架中無意檢得一舊帙卽剞設蠶桑局時文稿紙墨如新因乞歸藏於

家靈爽所憑或非無故伯旭年已八十餘談次猶神其事云

呂青芝邑名諸生縣府院三試皆冠軍家世業農公讀以佐耕弟青藜求析爨再三勸止弟不可後弟窘甚公館穀所入必以分弟曰吾與弟天倫溫飽共之較之勿忍也好吟咏善擘窠書工畫鱸魚蘆雁尤佳寸縑片紙邑人爭寶之嘗畫百色圖煊染三載方成今猶藏其家著有覆甕詩鈔其館中思親吟有不知拜別後更白幾莖髭句纏綿悱惻至性溢於言表

梁葆仁字承薪號西園又號澤春生有宿慧家故貧或至不舉炊隨諸兒入塾不一言師大異之其祖教更嚴每日余老矣異日汝成立詣余墓前祭告一言余願慰矣族兄東廬孝廉亦時資

以薪米得游學省垣文譽日起時彭剛直適蒞杭欲羅公置門下公婉卻之雅不願以他途進富陽夏主政震武獨心契之丙子鄉薦後歷掌天台嵎縣諸書院教卽先完先人積逋丙戌捷南宮庚寅以知縣籤發湖北回里省墓思及前語有餘哀焉甫至鄂總督張之洞卽委辦文案謂深微奧折胎息秦漢鄂臬陳寶箴尤賞異之然六年間閒散如故偶書春聯拈江梅有雪不知寒之句黃忠浩爲言於鄂撫答曰行不寒矣丙申六月補天門縣四月間尙委辦京山唐心口堤工是時水陡漲堤潰民登屋呼號公惻然以船拯男女一千二百餘人并設餅糜以濟之久之始赴任手自治事者三月至廢寢食雖案無留牘而鬢髮

因之漸白邑中積弊莫甚於命案勿論貧富眞僞動給夫馬錢百八十串其家先破甚至禍及四鄰名曰飛鄰公首除之遇事只帶衙役十餘人不許絲毫索詐自是弊遂絕天不雨禱輒應民皆神之卽以荒逃亡因而回家者益衆十月兼委前堤工彈壓員同事八十餘人估工約八十餘萬緡張文襄親自詣勘苦無策其心腹李紹遠於月下邀公親勘密議公獨覈實以二十五萬請因以上達遂據以爲限衆愕然後工告竣如其言且省一萬餘緡自是安陸等四邑俱本其法行之稱爲堤工第一時適以饑辦賑公編定戶口五日爲期樹幟與軍伍點名式相彷彿竟一無弊期年後積案清理畧盡邑有孝子年二十餘割肝

救母春有麥穗三歧人以爲公德政之化也又爲購地種桑一  
一示以成法爲書院資生息且云是土宜桑異日得與江浙埒  
余願畢矣但余病日甚未知得見成林否士民間之悲感交集  
知公有退意固留公文襄語人云湖北第一好官奈何聽其去  
端撫適湘給假孟臬則徑以在任調養改注批下士民大悅適  
庚子禍起華夷幾成冰炭公力疾治之外人亦心折後傳旨嘉  
獎并賞銜翎進道階非所願也文治督浙學舉人材以可勝將  
帥之任保公已病不支矣乞假回日婦孺至有垂淚者猶冀其  
回任也公旣退於所居止止山莊旁立一軒曰兩曲復營東廬  
墓地建祖父祠凡親族貧乏者皆有以潤之而戒諸子則日討

勤儉蓋皆自少年艱苦中得之也年六十三卒

俞函三字春三號一卿一名朝陽繼更名岳字皋雪蓋意有所託也父宰仁詳孝友傳中家世宿儒故里人宗之門下特盛君獨與同里唐占瀛登瀛兄弟等三人相友善光緒初無錫薛福成觀察本道雅喜課士於署側勝地建後樂園調各屬高材生以充之旋出使去吳引孫繼之因改爲崇實書院掌教陸太史廷黻時自北回遂留主其事汲引尤廣君與焉比年餘陸忽語其高弟數人曰俞某才或不逮汝等然其刻苦好學則過之甯人始稍稍知君數年後回應甲午鄉試遂中式嗣選授雲和縣訓導邑故瘠苦君一不介意課士一如其子弟知府趙亮熙素以京官著清望獨器之曰此苦行頭陀也裁缺後猶與議改革事

不令遽歸趙去而君始回慨然以文獻自任著有沃洲小紀分上下二卷其辨金庭道院爲非今地與唐登瀛縑險訪元水晶岩題字記爲最精審志事設局君益虛懷商訂閒有遺文佚義一以君言爲圭臬故其採輯更多及戊午脫藁歲暮將付印金侯觴之曰此役雖予與同人不無心力然克成夙志者君也終始其事亦惟君凡事需則賊如時迫何君始身任之不復辭諉次日卽束裝赴滬局凡讐校補正之繁碎裝訂議價之紛擾以一身兼之如是者累月至忘節序今夏六月告竣有期矣而君竟以勞瘁客死先是金侯以疾謝事在籍已三月聞訃親往哭之至謂伯仁由我其言雖過而君固以身殉志矣君於經宗伊



洛今春得邵子皇極經世全書點勘探索益若有悟於史幼卽  
喜史記在邵子二雲評本尤爲致力今爲刊行於世爲文章必  
委曲詳盡餘則著述散見當俟後爲補定生平冬夏一蔬布事  
繼母以孝稱每與故舊言欲於高洩故墟築一草廬名之曰厂  
廬爲讀書娛老地迄不可得或者生有夙因故於世未久歟志  
事適成又遭此變後之見者悲感當益無盡時